

# ROMANOS

## ITLAJCUILOL ON APÓSTOL SAN PABLO PARA ON ROMANOS

*Pablo oquintlacuilhuij on tlaneltocaquej ne Roma*

<sup>1</sup> Nejhua, Pablo, niitequitcau Jesucristo. Dios onechnotz niman onechcalactij para niapóstol. Yejhua onechtlapecpenij para nicteijlis on cuajli tlajitojli yejhuan quitemaca temaquixtilistli.

<sup>2</sup> Yejhua in temachtijli yoquimelajcaijtojca ipan on Yectlajcuilojli intechcopia on itiotlajtojcahuau.

<sup>3</sup> In temachtijli technojnotza ica toTeco Jesucristo. Yejhua iConetzin Dios, niman ijcuac ot-lacat, yejhua huejca teixhuiu\* catca itech on rey David.

<sup>4</sup> Pero ijcuac onoyolihuitij† niman onoquetzteu ipan itlalcon, on Espíritu Santo oquipanextij ica poder ica yejhua iConeu Dios.

<sup>5</sup> Itechcopia niman ipampa Jesucristo, Dios onechmacac iteicnelilis‡. Niman ican iteicnelilis onechtitlan quen apóstol para ma niquinnojnotzati on xhebreos yejhuan chantij ipan nochí países. Niconminnojnotza para ma quineltocakan niman ma quitlacamatican Dios.

<sup>6</sup> Niman nemejhuamej no nentehuamej omech-notzquej para no nenteyaxcahuans§ itech Cristo.

---

\* **1:3** descendiente    † **1:4** resucitó; onoyolitij    ‡ **1:5** misericordia    § **1:6** le pertenecen; nenteaxcahuau, nentehuaxcahuau, nentetlatquihuau

**7** Nemechtlaajcuilhuiya, tej, nochimej nemejhuatej yejhuan nenchantij ipan on hueyican itoca Roma yejhuan neniteltajsojcayaxcahuán Dios. Ma Dios toTajtzin niman toTeco Jesucristo mechmacacan intlatiochihualis niman inyolsehuilis.

*Pablo quinequi comintlajpalos on tlanelto-caquej yejhuan chantij ne Roma*

**8** Aman, tej, itechcopia Jesucristo nicmaca tlaxtlahuijli noDios nemopampa nemochimej\* pampa on tlacamej nochihuiyan chantij yocaquej quen nemejhuatej nentlaneltocaj.

**9** Nictequipanohua Dios ican nochi noyojlo ica nicteijlia on cuajli tlajtojli ica on iConetzin. Dios cualitzicaj ica nochipa nemechelnamiqui ipan nooración.

**10** Desde ye huejcahui onicnec nemechonnotzas. Yejhua ica, tej, nictlajtlanilia Dios ma nechcahuili nemechnotzati tla yejhua quinequi.

**11** Sanoyej nicnequi nemechitas para nemechmacas itlaj tetlayocolijli yejhuan quisa itech on Espíritu Santo para xmelajcanemican.

**12** Niquijtosnequi ma titoyolehuacan se ihuan ocse ica on tlaneltoctli yejhuan ticpiaj.

**13** Nocnihuan, nicnequi xmatican ica miyecpa onicnec nemechonnotzas, pero hasta aman xnechcahuiliaj niau. Nicnequi nias para yacamej niquinyolchicahuas niman niquinyolcuepas para más ma quineltocacan Dios ijcon quen nicchihua inhuan on ocsequimej yejhuan xhebreos.

---

\* **1:8** todos ustedes; nannochti, yemochimej, anochimej, innochimej, emmochimej

<sup>14</sup> Nicmati ica oncaj nitequitis intech on yejhuan griegos niman yejhuan xgriegos, niman intech on yejhuan tlamatquej niman on yejhuan xtlatamatquej.

<sup>15</sup> Yejhua ica, aman ica yoninocau para no nemechmachtis on yejhuan nenchanejquej ne Roma on temachtijli ica temaquixtilistli.

*On temachtijli ica temaquixtilistli quipia poder*

<sup>16</sup> Xnipinahua, tej, para nicteijlis on cuajli tlajtojli yejhuan quitemaca temaquixtilistli, pampa on yejhua ipoder Dios para quimaca temaquixtilistli nochimej on yejhuan quineltocaj. On temaquixtilistli achtoj opeu quipiaj on hebreos, pero aman no pehua intech on yejhuan xhebreos.

<sup>17</sup> Yejhua in cuajli tlajtojli yejhuan quitemaca temaquixtilistli techmachiltia quen ijqui Dios quimaca se tlacatl yolmelahualistli. Dios quimaca yolmelahualistli san ipampa itlaneltoc niman xitllaj<sup>†</sup> ocse ipampa ijquin quen quijtohua in Yectllajcuilojli: “On tlacatl yejhuan yolmelajqui san itechcopa itlaneltoc nemis.”

*On yejhuan xquineltocaj Cristo quipiaj tlajtlacoljli*

<sup>18</sup> Tiquitaj, tej, ica on itlahuel Dios, desde ne ilhuicac hualehua para yejco intech on xcua-jcualtin niman xyolmelajquej tlacamej yejhuan, impampa intlajtlacolhuan xcahuiliaj ma nopantlanti on tlen melahuac.

<sup>19</sup> Yejhuatej cuajli quimatztoquej on tlajtlamach<sup>‡</sup> se hueli quimati itech ica Dios, pampa sa no yejhua Dios yoquintitij.

<sup>†</sup> **1:17** nada; coxtla    <sup>‡</sup> **1:19** cosas

**20** Nochi tlen Dios itequiu yejhuan xtiquitaj hueli ticmatij itechcopa on tlajtlamach yejhuan oquitlalij. Desde ijcuac in tlalticpactli oquitlalij, cuajli pantlantiticaj ica yejhua Dios niman ica ipoder xqueman tlamic. Yejhua ica, tej, ijcuac quintlajtlacolmacasquej, xhuelisquej itlaj ica tenanquilisquej yejhuan quimpalehuis para nomanahuisquej.

**21** Masqui yejhuamej oquimatquej ica Dios nemi, xoquitlacaitaquej quen Dios nion xoquimacaquej tlaxtlahuijli. Pero intlamachilis xoc hueli quinemilia on tlamach yejhuan tepalehuij, niman inyoltechicahualis hasta xoc hueli itlaj tlen cuajli cajsicamatij.

**22** Masqui notenehuaj tlamatquej, yejhuamej onquisaj tontos.

**23** Yejhuamej xquimahuistiliaj ihueyilis Dios yejhuan xqueman miqui, yej quimahuistiliaj on yejhuan tlamachijchijhaulti intajtzitzihuan. In intajtzitzihuan tlajtlacha quen tlacamej yejhuan miquij noso ican intlachalis on totomej, cohuamej niman on yolquej yejhuan quipiaj nahui imicxi.

**24** Yejhua ica, tej, Dios oquincahuilij ma quichihuacan on tlajtlamach tlen xchipahuac yejhuan inelehuijis oquinec. Niman ijqui oquinochihuiliiquej on tlen tepinajti quen on tlacamej noelehuijas niman on sihuamej no noelehuij.

**25** Yejhuamej oquipatlaquej on tlen melahuac itech ica Dios yejhua ica on tlen tlacajcayahualistli. Yejhuamej quitlacaitaj niman cueyiliaj on tlen Dios oquitlalij, pero xquitlacaitaj ni-

man xcueyiliaj Dios aquin quitocarohua quiselis yectenehualistli para nochipa. Ma ijqui nochihua.

**26** Dios, tej, yejhua ica oquincahuilij ma quichihuacan on xcuajli tlajtlamach yejhuan inelehuis oquinec. Niman inelehuis tepinajti. Hasta on sihuamej onopatlaquej yej insihuaxihuan quinelehuaiyaj.

**27** On tlacamej no ijqui yej intlacaxihuan quinelehuiyaj hasta campa xoc hueli. Yejhuamej, tej, quinochihuilaj tlajtlamach tlen tepinajtij, niman pampa ijcon nonejnequiyaj, quijyohuiyaj on castigo yejhuan quipiaj ipan intlalnacayo quen quitocarohua.

**28** Pampa xoc quinequij quimatisquej tlajtlamach itech ica Dios, Dios oquincau, niman oquinemilijquej on tlen sanenca. Yejhua ica yejhuamej quichihuaj on tlen xquitocarohua quichihuasquej.

**29** Innemilis tenticaj ican nochil tlajtlamach tlen xcuajli. Ahuinemij, xyolmelajquej, quitejelehuiliaj tlajtlamach quen xquitocarohua niman quinchihuilaj xcuajli ocsequimej. Yejhuamej ican nochil inyojlo nexicolmiquij, temictiaj, quipejpehualtiaj tlahuejli, tlacajcayahuaj, quichihua nochil tlin xcuajli niman chacuamej.

**30** Yejhuamej teijijtohuaj, istlacetatij, quitlahuelitaj Dios, xtetlacaite, nohueyimatij niman nohueyitenehuaj. Quinemiliaj tlajtlamach más tlen xcuajli para quichihuaj niman xquitlacamatij intajhuan.

**31** Yejhuamej tontos, xquichihuaj tlen quijtohuaj, xacaj quitlajsojtlaj\*, xtetlapojpolhuiyaj ni-

---

\* **1:31** aman

man xteicneliaj<sup>†</sup>.

<sup>32</sup> Masqui cuajli quimatztoquej ica Dios otlanahuatij ma miquican on yejhuan quichihuaj on tlen xcuajli tlajtlamach, yejhuatej oc‡ más quichihuaj. Niman hasta ican pactli quintaj on yejhuan no ijqui quichihuaj.

## 2

### *Dios quintlaxtlahuilia on tlacamej quen quito-carohua*

<sup>1</sup> Yejhua ica on tlacatl yejhuan tetlajtlacolmaca xhuelis itlaj ica quinanquilis Dios para ica no manahuis itech. Ximportarohua aquin yejhua. Ijcuac ocse quitlajtlacolmaca, sa no yejhua notlajtlacolmaca pampa sa no yejhua tlajtlamach\* quichihuua.

<sup>2</sup> Ticmatztoquej, tej, ica ijcuac Dios tetlajtlacolmaca, itetlajtlacolmacalis quixtia ipan on tlen melahuac se quichihuua.

<sup>3</sup> On tlacatl yejhuan no quichihuua on tlen quichihuaj on tlacamej yejhuan quintlajtlacolmaca, quitocarohua quimati ica quiselis on tejmoti tlajtlacolmacalistli yejhuan Dios quimacas.

<sup>4</sup> San pampa Dios ican itetlajsojtlalis<sup>†</sup> quiyohuilia, yejhua xquitocarohua quinemilis ica ijyohuilis Dios xhueyi quijtosnequi. Dios quiyohuilia ican itetlajsojtlalis pampa quinequi quimacas tiempo para ma nopatla iyojlo.

<sup>5</sup> Pero ijcuac se tlacatl yoltechicactic niman xquinequi noyolpatlas, on tlajyohuclistli sa no

<sup>†</sup> 1:31 no tienen misericordia    <sup>‡</sup> 1:32 todavía; sanquen    <sup>\*</sup> 2:1 cosas    <sup>†</sup> 2:4 su amor

yejhua quinomiyequilijticaj para quiselis ipan on tonajli ijcuac Dios tetlaxtlahuilis. Ipan on tonajli Dios quipantlantis itetlajtlacolmacalis quen quitocarohua.

<sup>6</sup> Ijcuacon, tej, cada se quitlaxtlahuilis quen quitocarohua ica on tlen se oquichiu.

<sup>7</sup> Niman on yejhuan quichihuaj canica para quitejtemohuaj on hueyilistli, niman tetlacaitalistli niman nemilistli yejhuan para nochipa itechcopa on tlen cuajli quichijtoquej, Dios quinmacas yencuic nemilistli yejhuan para nochipa quipiasquej.

<sup>8</sup> Pero on yejhuan nohueyimatij niman xquitlacamatij on tlen melahuac, yej quitlacamatij on tlen xcuajli, ica itlahuel Dios quinmacas intlajyohuilis.

<sup>9</sup> Nochimej on yejhuan quichihuaj on tlen xcuajli quipiasquej tlajyohuclistli niman ajmantli. Achtoj on hebreos quipiasquej niman no on yejhuan xhebreos.

<sup>10</sup> Pero nochimej on yejhuan quichihuaj on tlen cuajli quipiasquej hueyilistli, tetlacaitalistli niman yolsehuclistli. Achtoj on hebreos quipiasquej niman no on yejhuan xhebreos.

<sup>11</sup> Ijcon, tej, tiquitaj ica Dios xquichicoita<sup>‡</sup> se tlacatl ihuan ocse.

<sup>12</sup> Yejhua ica on yejhuan xquixmatij itlanahuatil Moisés niman tlajtlacohuaj popolihuisquej, masqui itlanahuatil Moisés xquintlajtlacolmacas. No ijqui, tej, on yejhuan quixmatij itlanahuatil Moisés niman tlajtlacohuaj, no quintlajtlacol-

---

<sup>‡</sup> **2:11** no hace acepción

macasquej quen yejhua on tlanahuatijli tlanahuatia.

<sup>13</sup> Dios, tej, xquijtohua ica intlajtlacolhuan on tlacamej yoquintlaxtlau san pampa caquij itlanahuatil Moisés, yej tla quitlacamatij nochi tlen tlanahuatia on tlanahuatijli.

<sup>14</sup> Pero ijcuac on xhebreos yejhuan xquipiaj itlanahuatil Moisés, quichihuaj sa no ijqui quen tlanahuatia on tlanahuatijli, yejhamej quiteititaj ica itlanahuatil Dios oncaj ipan inyojlo, masqui xquipiaj itlanahuatil Moisés.

<sup>15</sup> Ijcon, tej, quen yejhamej nohuicaj quiteititaj ica on tlanahuatijli tlajcuioloncaj ipan inyojlo. Intlamachilis no quiteixpantiliaj yejhua on, pampa quemantica quintlajtlacolmaca noso quemantica quinmanahuiya.

<sup>16</sup> Yejhua in no nochihuas ipan on tonajli ijcuac Dios itechcpa Jesucristo quintlajtlacolmacas on tlen iyanticaj ipan inyojlo on tlacamej. Nochi yejhua in nochihuas quen on cuajli tlajtojli ica temaquixtilistli quijtohua yejhuan nicteijlia.

*On hebreos quipiaj itlanahuatil Moisés pero xquitlacamatij*

<sup>17</sup> Aman ma ticnemilican ica on hebreos. Yejhamej quitlaliaj inyojlo itech itlanahuatil Moisés niman ican nohueyimatiplistli notenehuaj iconehuan Dios.

<sup>18</sup> Quimatij on tlen Dios quinequi para quichihuasquej, niman itechcpa on tlanahuatijli no quimatztoquej quen ijqui quitlapejpenisquej on tlen más cuajli.

<sup>19</sup> Cuitiaj ica huelis itech Dios quinyecanasquej on yejhuan xquixmatij niman huelis

quinmachtisquej on yejhuan xquixmatij on itemachtilhuan Dios yejhuan tlen melahuac.

**20** Quinemiliaj huelis quintlamachilistisquej on yejhuan xitlaj<sup>§</sup> quimajmatij niman huelis quinmachtisquej on yejhuan quen coconej ixpan Dios, pampa ipan on tlanahuajtijli quipiaj nochí on tlaixmachilistli niman nochí on tlen melahuac.

**21** Tla yejhuamej, tej, hueli quintlamachilistiaj ocsequimej, ¿tlíca\*, tej, xsa no yejhuamej no notlamachilistiaj? Niman tla yejhuamej quiteijliaj xcuajli para tlachtequilos, ¿tlíca, tej, yejhuamej no tlachtequij?

**22** Niman tla sa no yejhuamej no quiteijliaj xcuajli para ahuinmilos, ¿tlíca, tej, sa no yejhuamej no ijqui quichihuaj? Niman tla sa no yejhuamej no quintlahuelitaj on tlamachijchijhualtin intajtzitzihuán, ¿tlíca, tej, conichtequiv on tlen ipan intiopan nosentlaliaj?

**23** Yejhuan nohueyimatij pampa quipiaj itlanahuatil Moisés, pero xquitlacaitaj Dios pampa xquichihuaj on tlen tlanahuatia sa no yejhua on tlanahuatiijli.

**24** Yejhua ica on Yectlajcuilojli ijquin quijtohua: “On yejhuan xhebreos san nemopampa quijtohuiliaj Dios on tlen xcuajli.”

**25** On nescayotl itoca circuncisión melahuac quimpalehuisquia tla quitlacamatissquiaj nochí itlanahuatil Moisés. Pero tla xquitlacamatij on tlanahuatiijli, tla ijcon on nescayotl xitlaj quijtosnequi.

---

§ **2:20** nada; coxtla    \* **2:21** ¿por qué?; ¿tline?

**26** Niman tla on yejhuan xquipiaj on nescayotl itoca circuncisión niman quichihuaj on tlen tlanahuatia on tlanahuatijli, tla ijcon quinselis Dios quen quipiasquiaj on nescayotl, masqui xmelahuac quipiaj.

**27** On yejhuan xquipiaj on nescayotl ipan intlanacayo, pero quitlacamatij itlanahuatil Moisés, quintlajtlacolmacasquej on yejhuan xquitlajcamatij on tlanahuatilij masqui quipiaj on nescayotl niman quitlajcuilolpiaj on tlanahuatijli.

**28** Se tlacatl xmelahuac hebreo san pampa tlacati itech se familia yejhuan hebreo, nion xejhua melahuac circuncisión yejhuan notetlaliliaj ipan tlalnacayo.

**29** Yej melahuac hebreo on yejhuan hebreo ipan iyojlo. Niman on nescayotl itoca circuncisión yejhuan melahuac, oncaj ipan teyojlo. On nescayotl yejhuan melahuac se tlacatl quiselia itechcpa on Espíritu Santo niman xpampa on ica quitlacamati itlanahuatil on tlanahuatijli. On yejhuan melahuac hebreo xquiselia yectenehualistli intech on tlacamej, yej itech Dios.

### 3

**1** Tla ijcon ¿tlinon ica quipalehuiya tla se hebreo? Noso tla on hebreos quipiaj on circuncisión, ¿on yejhua quimpalehuis?

**2** Quemaj, sanoyej\* miyec quipia tlinon ica quimpalehuiya. On achtoj ica Dios oquinmacac para quejehuasquej iYectlajcuilol.

**3** Pero ¿tlinon nochihuas tla semej hebreos xquichihuasquej on tlen Dios oquitlalij ipan

---

\* **3:2** mucho

ipromesa? ¿Yejhua in quijtosnequi ica Dios xoc quichihuas on tlen oquitlalij ipan ipromesa?

<sup>4</sup> ¡Melauc, tej, Dios quichihuas on tlen oquitlalij ipan ipromesa! Masqui nochimej tlacamej xquichihuaj quen quijtohuaj, Dios nochipa quichihua quen yejhua quijtohuia. Ijquin, tej, quijtohuia on Yectlajcuilojli:

Ica on tlen tiquijtos, yejhua ica timopanextis ica ticuajli. Niman xhuelis mitztlajtlacolmacas ijcuac mitzyolcuitisquej.

<sup>5</sup> Pero tla totlajtlacol quipanextia ica Dios yolmelajqui, ¿tlinon, tej, quijtosnequi ijcuac Dios techcastigarohua? ¿Huelis tiquijtosquej ica Dios xcualli quichihua pampa techcastigarohua? (Ijquin tlajtlajtohuaj on tlalticpactlacamej itech ica Dios.)

<sup>6</sup> ¡Melauc, tej, ica ca! Tla Dios xcualli quichihuasquia ijcuac techcastigarohua, ¿quen ijqui, tej, huelisquia quintlajtlacolmacasquia on tlalticpactlacamej?

<sup>7</sup> Yacaj yejhuan xcualli iyojlo ijquin hueli quijtohuia: “Aman tla xnicchihua on tlen onictlalij ipan nepromesa, ocsequimej más hueli cajsicamatij ica Dios nochipa quichihua quen quijtohuia. Ijquin, tej, yejhua más quiselia hueyilistli. Tla ijcon, ¿tlica<sup>†</sup> nechtajtlacolmaca quen quitlajtlacolmaca on tlacatl tlajtlacolej?”

<sup>8</sup> Tla para ijcon, ¿tlica, tej, xnicchihua on tlen xcualli para Dios más ma quiseli on hueyilistli?” Sequimej quijtohuaj ica yejhua on nictemachtia, pero yejhuamej xican cuajli inyojlo quijtohuaj. Dios quintlajtlacolmacas quen quitocarohua.

---

<sup>†</sup> 3:7 ¿por qué?; ¿tline?

*Nochimej ticpiaj tlajtlacojli*

**9** ¿Aman, tej, tlinon? ¿Tejhuamej hebreos más tihuejhueyixtoquej ixpan Dios xquen on yejhuan xhebreos? ¡Melauc, tej, ica ca! Nejhua yonicteitij ica nochimej tlajtlacohuaj, sanquen on hebreos niman on yejhuan xhebreos.

**10** Niman ipan on Yectlajcuilojli ijquin tlajcuiolnesticaj:

Nion siquiera se xnemi yejhuan yolmelajqui tla-catl.

**11** Xnemi yejhuan cajsicamati iojhui Dios; xnemi yejhuan quinequi quitejtemos Dios.

**12** Nochimej on tlacamej oquitlalcahuiquej Dios; nochimej sanencaj nemij. Nion se xquichi-hua on tlen cuajli.

**13** Incamac molonqui ijnecuisti quen on tlalcon-tli yejhuan quitentlapojhuaj. Ican intlajtol quijtohuaj on tlen ica tlacajcayahuaj. Ni-man intlajtol quipia quen iascayo‡ yejhuan ica teijtlacohuaj quen on cohuatl quichihua ijcuac tecua.

**14** Nochi on tlahuijhuicaltilistli niman tlahuejli hasta incamac yonomat.

**15** Yejhuamej sa quimachixtoquej aquinon huelis quimictisquej.

**16** Yejhuamej texoxotoniaj niman tetlajyohuiltiaj nochihuiyan campa yahuij.

**17** Xquimatiij, tej, quen ijqui nohuicasquej inhuan ocsequimej ican yolsehuilistli.

**18** Yejhuamej xqueman quimacasij Dios.

---

‡ 3:13 veneno

**19** Nochi yejhua in tlajcuilolnesticaj ipan on tlajcuilolamatl yejhuan itlanahuatil Moisés. Ticmatztoquej, tej, ica nochi tlen quijtohua on tlajcuilolamatl, quimijlia on yejhuan on tlanahuatijli quinnahuatia. Ijcon quimijlia para nochi tlacatl ma ca sa ma quipia tlínón ica tenanquilisquej yejhuan quimpalehuis para nomanahuisquej, yej ixpan Dios ma noyolcuitican quen onohuicaquej.

**20** Yejhua ica, tej, Dios xacaj quijlis ica itlajtacolhuan yoquitlaxtlau pampa quichihua on tlen tlanahuatia on tlanahuatijli. Xmatztiacan, tej, ica on tlanahuatijli tepalehuiya san para techmachiltia ica titlajtlacolejquej.

*Itechcopa totlaneltoc ticseliaj on temaquixtilistli*

**21** Aman, Dios yotechpanextilij quen ijqui hueli techselia quen tiyolmelajquej, pero xpampa tla tictlacamatij on tlanahuatijli. Niman yejhua on nomelajcaita ipan on itlajcuilolamahuan Moisés niman ipan intlajcuilolamahuan on tiotlajtojquej.

**22** Dios quinselia on tlacamej quen yolmelajquej ipampa intlaneltoc yejhuan quipiaj itech Jesucristo. Ijcon Dios quichihua para nochimej yejhuan quineltocaj Cristo, pampa yejhua xquinchicoita on hebreos inhuan on xhebreos.

**23** Nochimej on tlacamej tlajtlacolejquej niman xquipiaj on yolmelajcanemilistli yejhuan Dios oquinec ma quipiacan.

**24** Pero itechcopa iteicnelilis§ yejhuan oquintlayocolij, quijtohua ica intlajtlacolhuan yoquint-

laxtlau. Yehua in quichihua itechcopa Jesucristo yejhuan oquitlaxtlau para totlajtlacol.

<sup>25</sup> Dios oquitlalij Cristo quen se huentli. Yehua oquitoyau iyesyo para ma quimpopolohuili intlajtlacol on tlacamej ijcuac quineltocasquej. Ijquin, tej, quiteititia ica yejhua yolmelajqui pampa achtoj nesiya ipan iiyohuilis ica xoquichihuiliq cuenta intlajtlacol on tlacamej yejhuan achtoj nemiyaj.

<sup>26</sup> Aman ipan in tonaltin quiteititia ica yejhua yolmelajqui niman quimijlia yejhuan quineltocaj Cristo ica intlajtlacolhuan yoquintlaxtlau.

<sup>27</sup> ¿Canon, tej, oncaj on tohueyimatisilis ica titotenehuaj ticuajcualtin? Tohueyimatisilis opopoliu. ¿Tlica opopoliu? Opopoliu pampa xotihuelquej oticchijquej on tlen tlanahuatia on tlanahuatijli niman yejhua ica oticneltocaquej Jesucristo.

<sup>28</sup> Ijcon, tej, tiquitaj ica Dios quiselia se tlapatl quen yoquintlaxtlau itlajtlacolhuan pampa quineltoca Cristo, niman xpampa tla quichihua tlen tlanahuatia on tlanahuatijli.

<sup>29</sup> ¿Tlen Dios san on hebreos inDios? ¿Tlen xno inDios on yejhuan xhebreos? Melahuac, tej, ica on xhebreos no yejhua inDios

<sup>30</sup> pampa xnemi más de se Dios. Yejhua, tej, quinmaca cuenta ica intlajtlacolhuan on hebreos yoquitlaxtlau ipampa intlanel toc niman on xhebreos no ipampa intlanel toc quinmaca cuenta ica intlajtlacolhuan yoquitlaxtlau.

<sup>31</sup> ¿Yehua in quiitosnequi ica ticahuaj quen

xitlaj\* quiijtosnequi yejhua on tlanahuatijli?  
¡Mela huac, tej, ica ca! Yej ticpantlantiaj ica on tlanahuatijli hueyi quiijtosnequi.

## 4

*Abraham quipia itemaquixtilis itechcopia  
itlaneltoc*

<sup>1</sup> ¿Tlinon, tej, tiquiposquej ica Abraham yejhuan toachtojtaj?

<sup>2</sup> Tla Dios quimaca cuenta ica itlajtlacolhuan yoquitlaxtlau ipampa on tlajtlamach\* yejhuan oquichiu, sa no Abraham huelisquia nohueyimatisquia ipampa on tlen cuajli oquichiu. Pero Abraham xitlaj<sup>†</sup> oquichiu para huelis nohuiyimatis ixpan Dios.

<sup>3</sup> ¿Tlinon, tej, quiijtohua on Yectlajcuilojli? On Yectlajcuilojli ijquin quiijtohua: “Abraham oquineltocac Dios niman san yejhua ica on, Dios oquiselij quen se yejhuan yolmelajqui.”

<sup>4</sup> Aman, tej, tla yacaj tequiti, quimacaj itlaxtlahuil niman on xsan quitlayocoliaj, yej quimacaj pampa quitlani ica on itequiu.

<sup>5</sup> Pero xacaj hueli quitlani temaquixtilistli ican on tlen quichihua, pampa in temaquixtilistli se tetlayocolijli para tlajtlacolejquej. Yejhua ica se tlacatl ica oncaj quineltocas Dios para Dios quimaca cuenta ica itlajtlacolhuan yoquitlaxtlau.

<sup>6</sup> No ijqui David quiijtohua ica on tlacatl quipia hueyi tlatiochihualistli yejhuan Dios quiselia quen yolmelajqui masqui xoquichiu tlajtlamach tlen cuajli.

\* 3:31 nada; coxtla

\* 4:2 cosas    † 4:2 nada; coxtla

**7** Ijquin oquijtoj David:

Tlatiochijtin on yejhuan Dios yoquintlapojpol-huilij nochii on tlen xcuaqli oquichijquej ni-man quipopolohua intlajtlacol.

**8** Sanoyej tlatiochiutli on tlacatl yejhuan aquin toTeco xquichihuilia cuenta itlajtlacolhuan.

**9** ¿San on yejhuan hebreos quipiasquej in tlatiochihualistli? ¡Ca! On yejhuan xhebreos no quipiasquej in tlatiochihualistli. Otiquijtojquej san pampa Abraham oquineltocac, Dios oquiselij quen se yejhuan yolmelajqui.

**10** Pero ¿quemanon ijcon oquiselij? ¿Ijcon oquiselij ijcuac ye quipia on nescayotl itoca circuncisión noso achtoj? Dios oquiselij Abraham quen yolmelajqui ijcuac xe quiseliaya on nescayotl.

**11** Abraham saquin‡ oquiselij on nescayotl. Ni-man icircuncisión yejhua señal noso sello ipampa itlaneltoc ica Dios oquiselij quen se yejhuan yolmelajqui. Pampa Dios oquiselij Abraham quen yolmelajqui ijcuac xe quinotlaliliaya icircuncisión, Abraham nochihua quen se tajtli para nochimej on yejhuan quineltocaj Dios, masqui xquipiaj circuncisión. Ijcon, tej, Dios quinselia quen on yejhuan yolmelajquej.

**12** Abraham no quen se tajtli para on yejhuan quipiaj on nescayotl itoca circuncisión. Pero yejhua xintaj pampa quipiaj on nescayotl ipan inacayo, yej pampa yejhuamej quipiaj intlaneltoc quen totataj Abraham oquipix ijcuac xe quinotlaliliaya circuncisión.

---

‡ 4:11 después

*Itechcopa intlaneltoc quiseliaj on tlen Dios oquimprometerohuilij*

<sup>13</sup> Dios oquinmelajcaijlij Abraham ihuan ihuej-cacone huan ica quiselisquej in tlalticpactli quen inherencia. Pero Dios xoquimelajcaijlij yejhua in pampa Abraham oquitlacamat on tlanahuati jli, yej pampa oquineltocac Dios niman yejhua ica Dios oquiselij quen se yejhuan yolmelajqui.

<sup>14</sup> Tla Dios quinmacasquia herencia san pampa quitlacamatij on tlanahuati jli, tla ijcon xitlaj§ ica tlapalehuisquia on tlaneltocatl, niman on tlen Dios oquimelajcaijlij quipolosquia ihueyilis.

<sup>15</sup> Campa oncaj on tlanahuati jli niman xquitlacamatij, no oncaj castigo. Pero campa xoncaj on tlanahuati jli, no xoncaj on xtetlacamatilistli.

<sup>16</sup> Yejhua ica Dios oquimprometerohuilij se herencia para quiselisquej tla quineltocasquej. On tlen Dios oquimelajcaijlij sa melajcaoncaj para nochimej ihuejcacone huan Abraham pampa yejhua quimpialia ican iteicnelilis\*. Yejhua on tlen Dios oquinmelajcaijlij xsan para yejhuamej on yejhuan on tlanahuati jli quintlacamati, yej no para nochimej on yejhuan tlaneltocaj quen Abraham otlaneltocac. Yejhua quen totaj para tinochimej.

<sup>17</sup> On, tej, Yectlajcuilojli ijquin quijtohua: “Onimitztlalij titajtli niman mohuejcacone huan nochayahuasquej ipan miyec países.” Ixpan Dios yejhuan Abrajam oquineltocac, Abraham yejhua tajtli. Dios sa no yejhua quinyolitia on mimiquej,

---

§ **4:14** nada; coxtla    \* **4:16** su misericordia

niman yejhua san ican itlanahuatil quichihua para ma onyaj on yejhuan hasta aman xe oncaj.

**18** Masqui nesiya ica in tlen Dios oquinmela-jcailij xhuelisquia nochihuasquia, Abraham otlamachix niman otlaneltocac niman yejhua ica Dios oquitlalij tajtli yejhuan ihuejcacone huan onochayajquej ipan miyec países ijcon quen Dios yoquijlijca: “Mohuejcacone huan miyequej yesquej.”

**19** Ijcuac Abraham oquixtlaloj itetzacalist<sup>†</sup> Sara niman ica sa no yejhua Abraham ye nisu para miquis pampa itlalnacayo ye quipiaya canaj cien xipan, xoquipoloj itlaneltoc.

**20** Yejhua, tej, xoometlamat nion oquipoloj itlaneltoc itech on tlen Dios oquimelajcailica. Yej itlaneltoc onoscaltij más cojtic niman oquihueyilij Dios.

**21** Yejhua ican nochí iyojo quimatzticatca ica Dios quipia poder para quichihuas nochí tlen oquimelajcailij.

**22** Yejhua ica, tej, ipampa itlaneltoc, Dios oquiselij quen se yejhuan yolkmelajqui.

**23** On tlajtoltin yejhuan quijtohua ica Dios oquiselij quen se yejhuan yolkmelajqui, xonijcuiloj san para Abraham.

**24** Yej no onijcuiloj para tejhuamej yejhuan Dios no techselia quen on yejhuan tiyolmelajquej. Ijquin techselia pampa ticneltocaj yejhua aquin quiyolitij toTeco Jesucristo ijcuac omic, niman oquetzteu ipan itlalcon.

---

<sup>†</sup> **4:19** esterilidad

**25** San ipampa totlajtlacol, toTeco Jesús oquimictijquej. Niman quemaj yejhua oyoliu‡ san para Dios huelis techmacas cuenta ica totlajtlacolhuan yoquitlaxtlau.

## 5

*On yejhuan Dios quinmaca cuenta ica intlajtla-colhuan yoquintlaxtlau quipiaj intlanca*

**1** Aman, tej, ipampa totlaneltoc Dios techmaca cuenta ica totlajtlacolhuan yoquintlaxtlau. Yejhua ica ihuan yejhua ticpiaj yolsehuilistli itechcopia toTeco Jesucristo.

**2** Ipampa totlaneltoc Jesucristo yotechmacac iteicnelilis Dios niman aman timelajcanemij ipan iteicnelilis\*. Niman totlamachalis techpactia ica Dios tinochimej techmacas hueyilistli.

**3** Niman xsan yejhua ica on tipaquij, yej no tipaquij ijcuac tlamach ica tipajsolihuij pampa ticmatztoquej ica on tlapajsolihuistli techpalehuiyaj para ticxicohuaj nochí.

**4** Niman ijcuac ticxicohuaj on tlajyohuclistli ixpan Dios, ticpactiaj. Niman ijcuac ijcon ticpactiaj Dios, ticchaj on tlen otechmelajcailij.

**5** Niman ticmatij ica ticselisquej on tlen techmelajcailia pampa Dios yoquitemitij toyojlo ican itetlajsojthalist†. Yejhua in oquichiu itechcopia on Espíritu Santo yejhuan otechmacac.

**6** Ipan on tonajli yejhuan Dios oquitlapejpenij, ijcuac tejhuamej xotihuelquej otitomaquixtijquej, Cristo omic impampa on xcuajcualtin tlacamej.

---

‡ **4:25** resucitó; oyol    \* **5:2** su misericordia    † **5:5** amor

<sup>7</sup> Sanoyej ohuijticaj<sup>‡</sup> para yacaj miquis ipampa se yolmelajqui tlacatl. Cas nemi se yejhuan quipia iyojlo para miquis ipampa on yejhuan semi sanoyej<sup>§</sup> cuajli tlacatl.

<sup>8</sup> Pero masqui oc<sup>\*</sup> titlajtlacolejquej catcaj, Cristo topampa omic. Ijquin, tej, Dios otechititij quen sanoyej techtlajsojtla.

<sup>9</sup> Aman, tej, Dios techmaca cuenta ica totlajtlacolhuan yoquintlaxtlau pampa Cristo yotoyau iyesyo niman yomic topampa. Tla ijcon, tej, oncaj más tlinon ica Cristo techmanahuis itech itlahuel Dios.

<sup>10</sup> Tla ijcuac tiitlahuelicnihuan catcaj Dios, yejhua otechmacac yolsehuilistli itechcopa imiquilis iConetzin, tla ijcon, tej, aman oncaj más tlinon ica huelis timaquisasquej itechcopa inemilis pampa otechmacac yolsehuilistli.

<sup>11</sup> Niman xsan yejhua in, yej no tipaquij itech Dios itechcopa toTeco Jesucristo. Ipampa on tlen oquichiu, ticpiaj yolsehuilistli ihuan Dios.

### *Pablo oquiteititij quen Adán niman Cristo sesetlamantic tlacamej*

<sup>12</sup> Ipan in tlalticpactli on achtoj tlacatl otlajtlacoj niman ipampa on tlajtlacojli oncaj miquilistli. Niman aman nochimej miquisquej pampa nochimej tlajtlacohuaj.

<sup>13</sup> Ijcuac xe oncatca itlanahuatil Moisés ye oncatca tlajtlacojli ipan in tlalticpactli, masqui Dios xoquintlajtlacolmacac on tlacamej ijcuac xe oncatca on tlanahtujli.

---

<sup>‡</sup> 5:7 difícil

<sup>§</sup> 5:7 muy

<sup>\*</sup> 5:8 todavía; sanquen

**14** Pero nochimej on tlacamej yejhuan onenquej desde Adán hasta Moisés omiquej masqui intlajtlacolhuán xijqui catca quen itlajtlacol Adán. Yejhua xoquitlacamat itlanahuatil Dios. Adam quixnescayotiaya on yejhuan huajlasquia.

**15** Itlajtlacol Adán xhuelis para notemachihuas ihuan itetlayocolil Dios yejhuan techmaca. Ijcon, tej, ipampa itlajtlacol Adán miyequej omiquej. Pero on temaquixtilistli yejhuan Dios yetetlayocolij itechcopia Jesucristo, más sanoyej hueyi niman yej para ijcuajlilis miyec tlacatl.

**16** On itlajtlacol Adán xhuelis para notemachihuas ihuan on temaquixtilistli yejhuan Dios techmaca. San ipampa se tlajtlacojli, tlajtlacolmacalistli oyejcoc. Pero on temaquixtilistli oyejcoc saquin<sup>†</sup> ijcuac yoquichijquej miyec on tlen tlajtlacojli, niman Dios otechmacac cuenta ica totlajtlacolhuán yoquintlaxtau.

**17** Ipampa itlajtlacol se tlacatl, nochí tlacatl ica oncaj miquis. Pero xijqui yes para on tlacamej yejhuan quiselisquej ihueyi teicnelilis<sup>‡</sup> Dios, niman Dios quimaca cuenta ica intlajtlacolhuán yoquintlaxtau. Yejhamej quipiasquej poder ipan inyencuicanemilis ipampa Jesucristo.

**18** Niman ijcon quen Dios oquintlajtlacolmacac nochimej ipampa itlajtlacol Adán, no ijqui Dios quimaca cuenta ica intlajtlacolhuán yoquintlaxtau niman quinmaca yencuic nemilistli nochí tlacatl ipampa imelajcatequiyo Jesucristo.

**19** Ijcon quen miyequej onocuepquej tlajtlacolejquej san ipampa se tlacatl xoquitlacamat Dios,

---

<sup>†</sup> 5:16 después    <sup>‡</sup> 5:17 misericordia

no ijqui Dios miyequej quinselis quen on yejhuan yolmelajquej pampa se tlacatl oquitlacamat Dios.

<sup>20</sup> On tlanaxahuatijli onijcuiloj para techtititia quech tlajtlacojli ticpiaj. Niman ijcuac ticmatij ica ticpiaj sanoyej miyec tlajtlacojli, no ijqui ticmatij ica más hueyi iteicnelilis Dios.

<sup>21</sup> Yejhua ica, ijcon quen on tlajtlacojli oquipix poder para otemicij, iteicnelilis Dios no ijqui quipia poder para techmaca on nemilistli yejhuan para nochipa. Yejhua in nochihua ipampa on yolmelajcalistli yejhuan ticselia itechcopa toTeco Jesucristo.

## 6

*On tlajtlacojli xoc mechchihualtis nenquichihuasquej on tlin xcuaajli*

<sup>1</sup> ¿Tlinon, tej, tiquijtosquej? ¿Titlajtlacosquej más para Dios más techmaca iteicnelilis\*?

<sup>2</sup> ¡Melahuac, tej, ica ca! On tlajtlacojli xhueli techtilana pampa tejhuamej yotimiquej itech tlajtlacojli para ma ca más titlajtlacosquej. Yejhua ica, tej, tla yotimiquej, ¿quen ijqui huelis más titlajtlacojtasquej?

<sup>3</sup> ¿Tlen xnenquimati ica tinochimej yejhuan yotitocuatequijquej para ticteititiaj ica titosentlaliaj ihuan Cristo Jesús, no yotitocuatequijquej para ticteititiaj ica ihuan otimiquej?

<sup>4</sup> Ijcuac otitocuatequijquej, otitolaltocaquej ihuan Cristo niman timictoyaj ihuan para ijcon quen Cristo oyoliu<sup>†</sup> niman onoquetzteu ipan

---

\* **6:1** su misericordia    † **6:4** resucitó; oyol

itlalcon ican ihueyilis toTajtzin, tejhuamej no ma tinemican ican on yencuic nemilistli.

<sup>5</sup> Tla otitosenthalijquej ihuan Cristo ipan imiquilis, tla ijcon, tej, on no melahuac ica ihuan tiyolisquej niman titoquetztehuasquej.

<sup>6</sup> Ticmatztoquej ica on tonemilis yejhuan oticpixquej ijcuac xe ticneltocayaj Cristo, onomajmasohualtiquej<sup>‡</sup> ipan cojnepanojli§ ihuan Cristo para ipoder on tlajtlacojli yejhuan ipan tonemilis oncatca oxoxoton, niman ijcon on tlajtlacojli ipan tonemilis xoc techpia tlanamactin.

<sup>7</sup> Xoc techpia tlanamactin, pampa ijcuac se miqui, nomanahuiya de ipoder on tlajtlacojli.

<sup>8</sup> Tla tejhuamej yotimiquej ihuan Cristo, ticneltocaj ica no tinemisquej yejhua ihuan.

<sup>9</sup> Ijquin ticneltocaj pampa ticmatztoquej ica Cristo oyoliu niman onoquetzteu ipan itlalcon niman yejhua ica xoqueman ocsejpa miquis. On yej, miquilistli xoc quipias.

<sup>10</sup> Cristo, tej, san sejpa omic para yeyica oquipopoloj tlajtlacojli, pero ijcuac oyoliu, oyoliu para quichihua on tlen Dios quinequi.

<sup>11</sup> Nemejhuamej, tej, xmatican ica on tlajtlacojli xhueli mechtilana pampa nemejhuamej yonemiquej ihuan Cristo. Niman no xmomatican ica nennemij ihuan Jesucristo para Dios mechteinquitiltia.

<sup>12</sup> Yejhua ica, tej, ma ca sa xcahuilican ma mechtilana on tlajtlacojli ipan nemotlalnacayo

<sup>‡</sup> **6:6** fueron crucificados; onopilojquej § **6:6** cruz

para nenquitlacamatisquej on xcuajcualtin ele-huilstin\*.

<sup>13</sup> Ma ca xcahuilican on tlajtlacojli ma quite-quiltli nion se parte nemotlalnacayo para ma quichihua on tlen xcuajli. Yej xcahuilican ma Dios mechtequitli quen on tlacamej yejhuan omiquej pero ocsejpa oyolihuiquej niman ono-quetztejquej ipan intlalcon. Xtemacakan, tej, cada parte nemotlalnacayo itech Dios para ma quichi-hua on tlen cuajli.

<sup>14</sup> On tlajtlacojli xhuelis mechchihualtis nenquichihuasquej on tlen xcuajli, xpampa on tlanahuatijli mechyecana, yej mechyecana iteicnelilis† Dios.

*Aman xoc tinemij tlanamactin itech on tlen xcuajli*

<sup>15</sup> ¿Tlinon, tej, ticchihuasquej? ¿Más titlajtlacosquej pampa on tlanahuatijli xejhua techye-cana yej techyecana iteicnelilis Dios? ¡Melahuac, tej, ica ca!

<sup>16</sup> Nemejhuamej cuajli nenquimatztoquej ica tla nemotemacaj quen tlanamactin itech se teteco‡ para nenquitlacamatisquej, nemejhuamej nent-lanamactin yesquej itech on yejhuan nenquitla-camatisquej. Ijcon, tej, ijcuac nenquitlacamatij on tlajtlacojli, yejhua nochihua quen nemoteco niman mechajcilia on miquilistli. Noso tla nen-quitlacamatisquej Dios, yejhua nochihua quen nemoteco niman ijcon nenyolmelajcanemisquej.

<sup>17</sup> Pero tlaxtlahui Dios ica masqui nemejhuamej nentlanamactin catcaj itech on tlajtlacojli, aman

---

\* **6:12** deseos, pasiones    † **6:14** su misericordia    ‡ **6:16** amo o dueño

ican nochí nemoyojlo nenquitlacamatztoquej on itemachtil Dios yejhuan yonenquiselijquej.

**18** Dios omechmanahuij itech on tlajtlacojli yejhuan nemoteco catcaj, niman aman onemochijquej tlanamactin itech on yolmelajquelistli.

**19** Nemechtlaçcuilhuiya ica in quen in ejemplos de tlanamactin pampa xhueli cuajli nencajsicamatij in tlajtlamach§. Aman, tej, ijcon quen achtoj onenquitemacaquej nemotlalnacayo quen tlanamactin ipan on tlen xchipahuac niman ipan on tlen xcuajli para nenquichihuayaj on tlajtlacojli, no ijqui aman xtemacakan nemotlalnacayo quen tlanamactin ipan on yolmelajquelistli para nemonemilis cuajli yejyejtias itech Dios.

**20** Ijcuac nemejhuamej oc\* nentlanamactin catcaj ipan on tlajtlacojli, xnennemiyaj ipan on yolmelajquelistli.

**21** ¿Tlinon, tej, ica mechpalehuij ica onenquichijquej on tlajtlacoltin yejhuan aman nenquipinahuismatij? On tlajtlacoltin san quitemacaj miquulistli.

**22** Pero aman xoc nentlanamactin ipan on tlajtlacojli, yej nentlanamactin itech Dios. Yejhua ica nemonemilis cuajli yejyejtias itech Dios niman ijcon, tej, no nenquiseliaj on nemulistli yejhuan para nochipa.

**23** On tlajtlacojli quitemaca tlaxtlahuijli ican miquulistli, pero Dios quitemaca tetlayocolijli ican nemulistli yejhuan para nochipa. Niman on nemulistli ticseliaj itechcopa Cristo Jesús toTeco.

---

§ **6:19** cosas    \* **6:20** todavía; sanquen

## 7

*Ipan on namictilistli quixtiaj se ejemplo*

<sup>1</sup> Nocnihuan, nemechtajcuilhuiya nemejhuatej yejhuan nenquixmatij on tlanahuatijli. Nemejhuatej ye nenquimatztoquej ica on tlanahuatijli san hueli quimandarohua yacaj chica yejhua yolticaj.

<sup>2</sup> In se ejemplo. Ijcuac se nonamictia, on tlanahuatijli quinahuatia on sihuatl para ma nosentlalijtia ihuan ihuehuentzin hasta queman miqui. Pero tla yomic ihuehuentzin, on tlanahuatijli xoc hueli quinahuatia ihuan ma nemí.

<sup>3</sup> Yehua ica, tej, tla on sihuatl nosentlalia ihuan ocse tlacatl chica ihuehuentzin nemí, yejhua nochihua tlacapajpatlaquetl. Pero tla ihuehuentzin miqui, on tlanahuatijli yejhuan quinahuatia on sihuatl xoc hueli quinahuatia, niman masqui yejhua nonamictis ihuan ocse tlacatl, xnochihua tlacapajpatlaquetl.

<sup>4</sup> No ijqui nocnihuan, nemejhuatej yonenmiquej itech on tlanahuatijli pampa yonenmiquej ihuan Cristo. Niman aman nennemij san secan ihuan Cristo yejhuan oyoliu\* niman onoquetzteu ipan itlalcon. Yehua in onochiu para tictequichihuiliaj Dios.

<sup>5</sup> Ijcuac xe timiquiyaj ihuan Cristo, titlajtlacohuayaj quen toyojlo quinequiya. Niman ijcuac oticmatquej tlen oquijtoj on tlanahuatijli, toyojlo más quinequiya tlajtlacos, niman yejhua in otechajcuilij on miquilistli.

---

\* **7:4** resucitó; oyol

**6** Pero itech on tlanahuatijli yejhuan techyecanaya ican itequihuajyo, aman yotimiquej. Yejhua ica aman tihuelij tictequichihuliaj Dios ica on yencuic nemilistli yejhuan techmaca on Espíritu Santo niman xejhua ica on tlanahuatijli isoltic.

*On tlanahuatijli ocsetlamantic xquen on tlajtlacojli*

**7** Tla ijcon, ¿tlinon, tej, tiquijtosquej? ¿Tiquijtosquej ica on tlanahuatijli xcuajli? ¡Melahuac, tej, ica ca! Yej ocse tlamantic. Nejhua xnicmatisquia catlejhua on tlajtlacojli tla on tlanahuatijli xnechititisquia. In se ejemplo. Nejhua xnicmatisquia tlinon quijtosnequi niquelehuis on tlen teyaxca<sup>†</sup> tla on tlanahuatijli xquijtosquia: “Ma ca xquelehui on tlen teyaxca.”

**8** Itechcopa in tlanahuatijli on tlajtlacojli onechyolchicau para niquelehuis miyec tlajtlamach<sup>‡</sup> yejhuan teyaxca. Tla xonyasquia on tlanahuatijli, xqueman nicmatisquia on tlajtlacojli.

**9** Ijcuac niconetl catca, xonicmat tlinon oquijtoj on tlnahuatijli. Ninemiya xican on tlanahuatijli. Pero ijcuac cuajli onicajsicamat on tlanahuatijli, onicmat ica on tlen onicchiu tlajtlacojli, niman ica yonimic ixpan Dios.

**10** Ijcon, tej, on tlanahuatijli yejhuan quitocarohuaya nechmacas nemilistli, yej onechtlajtlacolmacac para nimquis.

**11** On tlajtlacojli oquitequitiltij on tlanahuatijli para ica onechcajgayau niman ica onechmictij.

---

<sup>†</sup> **7:7** le pertenece; teaxca, tehuaxca, tetlatqui    <sup>‡</sup> **7:8** cosas

**12** Tiquitaj, tej, ica nochí on tlanahuatiltin chipajquej niman cada se tlanahuatijli chipahuac, niman yejhua melajqui niman cuajli.

**13** ¿Yejhua in quijtosnequi ica on tlen cuajli yejhua yonechmictij? ¡Mela huac, tej, ica ca! Itech-copa on tlanahuatijli yejhuan cuajli, on tlajtlacojli onechmacac miqUILISTLI para quipanextia ica mela huac yejhua tlajtlacojli. Yejhua ica itech-copa on tlanahuatijli oquiteititij ica on tlajtlacojli sanoyej§ xcuajli.

*On tlacamej quipiaj ome elehuilistli*

**14** Ticmatztoquej ica on tlanahuatijli cuajli niman quisa itech on Espíritu Santo. Pero nejhua ican notlalnacayo xnicuajli niman ninemi tlamatli itech on tlajtlacojli.

**15** Nejhua xnicajscamati tlinon nicchihua. Tej, xnihueli nicchihua on tlen cuajli nicnequi, yej nicchihua on tlen xnicuelita.

**16** Niman ijcuac nicchihua on tlen xnicnequi, notlamachilis nechmachiltia ica on tlanahuatijli mela huac cuajli.

**17** Tla ijcon, tej, xoc nejhua nicchihua on tlen xnicnequi, yej yejhua on tlajtlacojli yejhuan nicpia yejhua nechchihualtia.

**18** Nejhua, tej, nicmati ica ipan notlalnacayo xitlaj\* oncaj tlen cuajli, pampa masqui sanoyej nicnequi nicchihuas on tlen cuajli, xhueli nicchihua.

**19** Xnicchihua on tlen cuajli yejhuan nicnequi, yej oc† niconchijtiu on tlen xcuajli yejhuan xnicnequi.

---

§ **7:13** muy    \* **7:18** nada; coxtla    † **7:19** todavía; sanquen

**20** Ijcon, tej, tla nicchihua on tlen xnicnequi nicchihuas, xoc nejhua ijcon nicchihua, yej on tlajtlacojli yejhuan nicpia nechchihualtia.

**21** Ijquin, tej, nopan nochihua. Ijcuac nicnequi nicchihuas on tlen cuajli, xnihueli pampa on tlajtlacojli oncaj ipan notlalnacayo.

**22** Ipan noyojlo nicuelita itlanahuatil Dios.

**23** Pero ipan notlalnacayo nicmati ica oncaj yejhua in ocse tlanahuatijli yejhuan no quinequi nechnahuatis. Yejhua in tlanahuatijli de tlajtlacojli quitlahuelixnamiqui on itlanahuatil Dios yejhuan noyojlo cuelita. Yejhua in tlanahuatijli de tlajtlacojli yejhuan oncaj ipan notlalnacayo, nechpia quen nitzacuticaj.

**24-25** Yejhua ica, tej, ican noyojlo nicnequi nictlacamati on itlanahuatil Dios, pero ican notlalnacayo nictlacamati on tlanahuatijli de tlajtlacojli.

¡Lástima de nejhua! ¿Aquinon, tej, nechmaquixtis itech notlalnacayo yejhuan nechhuica ipan miquilistli? Nicmaca tlaxtlahuijli Dios ica san itechcopia toTeco Jesucristo hueli nechmaquixtia.

## 8

### *On nemelistli oncaj ipan iEspíritu Dios*

**1** Aman, tej, Dios xoc quintlajtlacolmaca on yejhuan nemij san secan ihuan Cristo Jesús, yejhuan nohuicaj quen on Espíritu Santo quinequi niman xquen intlalnacayo quinequi.

**2** Itechcopia Jesucristo on tlanahuatijli yejhuan quisa itech on Espíritu Santo yonechmanahuij

itech on tlanahuatijli de tlajtlacojli. On tlanahuatijli de tlajtlacojli nechhuicaya ipan miquilistli, pero aman on Espíritu Santo nechhuica ipan nemilistli.

<sup>3</sup> Itlanahuatil Moisés oquipoloj itequihuajyo pampa totlalnacayo xohuel oquitlacamat. Yehua ica on tlen on tlanahuatijli xohuel oquichiu, Dios oquichiu ijcuac ocuajtitlan iConetzin yejhuan onochiu Tlacatl ican itlalnacayo quen totlalnacayo, tejhuamej yejhuan titlajtlacolejquej. Dios ocuajtitlan quen itlaj huentli para quipopolos tlajtlacojli. Ijcon, tej, oquixoxotonij ipoder on tlajtlacojli

<sup>4</sup> para tejhuamej yejhuan titohuicaj quen on Espíritu Santo techyacana, niman xquen totlalnacayo quinequi, tihuelij ticchihuaj on tlajtlamach\* yejhuan tlanahuatia on tlanahuatijli.

<sup>5</sup> On yejhuan nohuicaj quen intlalnacayo quinequi sa ontlamatztoquej ipan on tlajtlamach yejhuan intlalnacayo quinequi, pero on yejhuan nohuicaj quen on Espíritu Santo quinequi sa ontlamatztoquej ipan on tlajtlamach yejhuan on Espíritu Santo quinequi.

<sup>6</sup> Tla ticomatzticaj on tlajtlamach yejhuan motlalnacayo quinequi, sa no yejhua mitzmictis, pero tla ticomatzticaj on tlajtlamach yejhuan on Espíritu Santo quinequi, sa no yejhua mitzmacas nemilistli niman yolsehuilistli.

<sup>7</sup> On yejhuan ontlamatztoquej ipan on tlajtlamach yejhuan intlalnacayo quinequi, tlahuelicniutin nemij ihuan Dios pampa nion xquinequij

\* **8:4** cosas

quitlacamatisquej itlanahuatil, nion xhuelij quitlacamatij.

<sup>8</sup> Yejhua ica, tej, on yejhuan nohuicaj quen intlanacayo quinequi xhueli quipactiaj Dios.

<sup>9</sup> Pero tla nenquipiaj on iEspíritu Dios ipan nemoyojlo, tla ijcon xnemohuicaj quen nemotlancayo quinequi, yej nemohuicaj quen on Espíritu quinequi. Niman tla yacaj xquipia iEspíritu Cristo, yejhua xteyaxca<sup>†</sup> itech Cristo.

<sup>10</sup> Pero tla Cristo yonenquiselijquej, nemoalma quipia nemilistli pampa Dios mechselia quen on yejhuan yolmelajquej, masqui nemotlancayo yomic ipampa on tlajtlacojli.

<sup>11</sup> Niman tla nenquipiaj iEspíritu Dios on yejhuan oquiyolitij Jesús niman oquiquetzteu ipan itlalcon, no quimacas yejhua yencuic nemilistli nemomicatlancayo itechcopa iEspíritu yejhuan nenquipiaj.

<sup>12</sup> Ijcon, tej, nocnihuan, nonequi titohuicasquej quen on Espíritu Santo quinequi, niman xquen totlancayo quinequi

<sup>13</sup> pampa tla nemejhuamej nemohuicaj quen nemotlancayo quinequi, nemoalma miquis. Pero nemoalma quipias nemilistli tla itechcopa on Espíritu Santo nenquipopolohuaj on tlajtlacojli yejhuan nenquichihuaj.

<sup>14</sup> Nochimej yejhuan quinyecana on Espíritu Santo, teconehuan itech Dios.

<sup>15</sup> On Espíritu Santo yejhuan onenquiselijquej xmechhuica para nentlanamactin yesquej ocsejpa itech nemojtilistli, yej quichihua para nen-

---

<sup>†</sup> 8:9 no le pertenece; xteaxca, xtehuaxca, xtetlatqui

tecone huan itech Dios. Yehua ica tiquijtohuaj: “ToTajzin.”

<sup>16</sup> On Espíritu Santo niman toyoló techijlia ica tiicone huan Dios.

<sup>17</sup> Niman tla titecone huan itech Dios, ticselisquej on herencia yejhuan otechmelajcaijlij. In herencia ticselisquej ihuan Cristo tla ihuan titlajyohuiyaj para más saquin<sup>‡</sup> ticselisquej on hueyilistli yejhua ihuan.

<sup>18</sup> Aman cuajli, nejhua ni quita ica on tlen aman tiquijyohuiyaj xitlaj<sup>§</sup> qui jtosnequi tla tiquixtlalosquej ihuan on hueyilistli yejhuan saquin ticselisquej.

<sup>19</sup> Nochi on tlen oncaj, on tlen Dios oquichijchiu, quichixtoquej niman sanoyej\* quinequisquiaj ma yecotetzi on tonajli ijcuac Dios quimpanextis on yejhuan iconehuan.

<sup>20</sup> Nochi tlen Dios oquichijchiu oijtlacau. Pero ijcon onochiu xpampa on tlajtlamach ijqui oquinequej, yej pampa Dios ijqui yotlatlajtlalijca. Pero masqui ijqui onochiu, oc<sup>†</sup> oncatca yejhua on tlamachalistli<sup>‡</sup>

<sup>21</sup> ica onyas se tonajli ijcuac nochi tlen oncaj ipan in tlalticpactli xoc ijtlacahuis. Nochi tlajtlamach nomana huis ijcon quen iconehuan Dios no nomana huisquej.

<sup>22</sup> Ticmatztoquej ica hasta aman nochi tlen Dios oquichijchiu nococohua niman chocha quen se sihuatl ijcuac quitlacatilia se conetzintli.

<sup>23</sup> Niman xsan yejhua on tlen Dios oquichijchiu

<sup>‡</sup> 8:17 después      <sup>§</sup> 8:18 nada; coxtla  
todavía; sanquen      <sup>‡</sup> 8:20 esperanza

\* 8:19 mucho      <sup>†</sup> 8:20

tlajyohuiya, yej tejhuamej no yejhuan ye ticpiaj on Espíritu Santo quen achtoj parte de nochí on tlen Dios techtlayocolis. Tejhuamej no sanoyej titlajyohuiyaj chica ticchixtoquej ma yejcotetzi on tonajli ijcuac Dios techselis para tiiconehuan ijcuac ipan totlalnacayo xoc itlaj techpajsolos.

<sup>24</sup> Yotimaquisquej pampa ticpiaj yejhua on tlamachalistli. Pero tla on tlen ticmachayaj yonochiu, tla ijcon xoc itlaj ticmachaquesquej pampa on tlen ticmachayaj yonochiu.

<sup>25</sup> Pero tla on tlen ticmachaj oc xnochihua, tla ijcon ticchaj ican ijyohuiliistli.

<sup>26</sup> No ijqui, tej, on iEspíritu Dios techpalehuiya ica on tlen xtihuelij, pampa tejhuamej xhueli ticchihuaj oración quen nonequi. Pero sa no yejhua on Espíritu Santo quitlajtlanilia Dios topampa ican chochocalistli yejhuan xacaj hueli quijtohua ican tlajtojli tlinon quijtosnequi.

<sup>27</sup> Niman Dios, yejhuan techyolixmati, quimati tlinon quijtosnequi on Espíritu, pampa on Espíritu quitlajtlanilia quen Dios quinequi impampa on yejhuan iyaxcahuan.

### *Itechcopa Cristo titetlanquej*

<sup>28</sup> Ticmatztoquej ica Dios quitequitiltia para cuajli, nochí on tlajtlamach yejhuan impan nochíhuela on yejhuan quitlajso tlaj§, on yejhuan oquintlapejpenij para quichihuaj on tlen quinequi.

<sup>29</sup> Dios quimatiya aquinomej quineltocasquej Cristo. Yejhuamej oquintlalij para nemisquej quen Cristo on iConetzin para yejhua yacatztias intzajlan miyequej icnihuan.

**30** Ijcon, tej, Dios oquinnotz on yejhuan oquintlalij para nemij quen iConeu. Xsan oquinnotz, yej quinmaca cuenta ica intlajtlacolhuan yoquitlaxtlau, niman on yejhuan oquinmacac cuenta ica intlajtlacolhuan yoquitlaxtlau no oquinmacacac hueyilistli.

**31** Yejhua ica, tej, ¿tlinon huelis tiquijtosquej? Tla Dios quipia iyojlo para techpalehuis, ¿aquinon huelis techyacatzacuilis?

**32** Dios, hasta iConetzin xoquinene\* para topampa oquitemacac, yej topampa oquitlalij iConetzin quen huentli para omic. Niman tla yejhua ijcon oquichiu, ¿hasta quen ijqui, tej, no ihuan iConeu xtechmacas nochí on ocsequi tlatiochihualistin?

**33** Xacaj huelis quinteixpanhuis on yejhuan Dios yoquintlapejpenij pampa Dios yoquijtoj ica intlajtlacolhuan yoquitlaxtlau.

**34** ¿Aquinon, tej, huelis quintlajtlacolmacas? Xacaj hueli pampa Cristo yejhuan omic niman ocsejpa oyoliu† nemi ne iyecmacopa Dios campa topampa tlajtojticaj.

**35** Xitlaj huelis techxelos itech itetlajsojtlalis Cristo. ¿Tlen huelis quichihuas on tlen teajman, noso on tlen teyolcocoj, noso on tlahuejli niman tlajyohuclistli, noso apistli, noso tla polihui on tlaquentli, noso peligro, noso miquilistli? ¡Ca! Xitlaj huelis techxelos itech itetlajsojtlalis Cristo.

**36** Ijquin, tej, quijtohua in Yectlajcuilojli:  
Oh Dios, san mopampa nochipa on tlacamej techmictisnequij. Techmatij quen itlaj borre-

---

\* **8:32** no negó    † **8:34** resucitó; oyol

guitos yejhuan quinmictiaj.

<sup>37</sup> Pero ipan nochí yejhua in, ticmatztoquej ica titetlanij nochipa itechcopa Cristo yejhuan otechtlajsojtlac.

<sup>38</sup> Cuajli nicmatzticaj ica xoncaj on tlen huelis techxelos itech itetlajsojtlalis Dios. On miquilistli, noso on nemilistli xhuelisquej. Niman yejhua on ilhuicactequitquej<sup>‡</sup> noso on ajacamej yejhuan tequihuajquej, niman nochí on ocsequimej ajacamej no xhuelisquej. No xhuelisquej, tej, techxelosquej itech itetlajsojtlalis Dios on tlen aman nochihua noso on tlen ocse tonajli nochihuas.

<sup>39</sup> No xhuelis, tej, quichihuas on tlen oncaj ne ilhuicac noso ipan tlalticpactli. No, nion se de nochí on tlajtlamach yejhuan Dios oquinchijchiu xhuelis techxelos itech on itetlajsojtlalis Dios yejhuan otechmacac itechcopa toTecotzin Cristo Jesús.

## 9

### *Dios o quintlapejpenij on yejhuan hebreos*

<sup>1</sup> Niquijtojticaj on tlen melahuac quen tlanelto-caquetl itech Cristo. Xnistlacati. Notlamachilis quiyecana on Espíritu Santo niman ijcon notlamachilis nechmachiltia ica niquijtohua on tlen melahuac.

<sup>2</sup> Nicpia sanoyej\* hueyi ajmantli niman nochipa ninoyolcocojticaj.

---

<sup>‡</sup> **8:38** ángeles: Angeles tequitij ne ilhuicac niman nican ipan in tlalticpactli.    \* **9:2** muy

**3** Niman sa no nejhua nicnequisquia nicpolosia notemaquixtilis tla yejhua ica huelisquia quinmacasquia temaquixtilistli on yejhuan hebreos quen nejhua.

**4** Yejhuamej hualejtoquej itech Israel, niman Dios oquinselij quen iconehuan. Intzajlan onen Dios ican ihueyilis, niman oquinmacac on pactos niman itlanahuatilhuan. Yejhuamej quipiaj on tlanahuatiyli yejhuan quintitia quen ijqui nonequi quimahuistilisquej Dios niman no oquiselijquej on tlen Dios oquinmelajcailij.

**5** Yejhuamej hualejtoquej intech on toachtojtajhuan. Niman Cristo ican itlalnacayo no hualejticaj intech on toachtojtajhuan. Yejhua, tej, Dios yejhuan nochi quinahuatia. Ma yejhua quiseli yectenehualistli para nochipa. Ma ijqui nochihua.

**6** Dios oquijtoj ica quinmaquixtis iconehuan. Niman tla on hebreos xnochimej quipiaj temaquixtilistli, xquijtosnequi ica Dios xotenquis on tlen oquijtoj. Yej cuajli xmatican ica xnochimej yejhuan hualejtoquej itech Israel Dios quimpohua quen ihuejcaconechein.

**7** No ijqui, tej, xnochimej yejhuan hualejtoquej itech Abraham nopohuaj quen ihuejcaconechein, pampa Dios ijquin oquijlijca Abraham: “Nopohuaj mohuejcaconechein san itech Isaac.”

**8** Ijcon, tej, tiquitaj ica xnochimej ihuejcaconechein Abraham teconechein itech Dios, pero san on coconej yejhuan tlacatij ipampa on tlen Dios otzemelajcailij nopohuaj quen melahuac hualejtoquej itech Abraham.

**9** On tlen Dios oquimelajcailij Abraham sa no yejhua in: “Ijcuac yejcos on cuajli tonajli, nihu-

jas, niman Sara quitlacatilis se conetzintli.”

**10** Niman yejhua in xica nochí. On cohuatzitzintin<sup>†</sup> iconehuan Rebeca san se tajtli quipiayaj yejhuan toachtojtajta itoca Isaac.

**11-13** Ijcuac on icniutin xe tlacatiyaj niman masqui xe quichihuaya tlen cuajli noso tlen xcuajli, Dios ijquin oquijlij Rebeca: “On yejhuan achtoj nemis, tequichijquetl yes itech on yejhuan saquin<sup>‡</sup> nemis.” Yejhua on tlajtojli cuajli ihuan nohuica on Yectlajcuilojli yejhuan quijtohua: “Jacob onictlajsojtlac<sup>§</sup>, pero Esaú onictlahuelitac.” Ijcon, tej, Dios oquipanextij ica quinamiqui quitlapejpenis on yejhuan yejhua quinequis. Yejhua ica tiquitaj ica Dios xoquichihuili cuenta tlen yejhamej oquichijquej, yej oquinotz on yejhuan oquinec quinotzas.

**14** ¿Tlinon, tej, tiquijtosquej? ¿Tiquijtosquej ica Dios xyolmelajqui? ¡Mela huac, tej, ica ca!

**15** Dios oquijlij Moisés: “Niquicnelis on yejhuan nicnequis niquicnelis, niman nictlajsojtlas on yejhuan nicnequis nictlajsojtlas.”

**16** Yejhua ica, tej, itetlajsojtlalis Dios xnoselia pampa se ijqui quinequi noso pampa se itlaj quichihua, yej noselia ipampa iteicnelilis\* Dios.

**17** Ipan in Yectlajcuilojli Dios ijquin oquijlij on rey de Egipto: “Nejhua onimitztlalij tirrey, san para nihuelis nicpantlantis nopoder itechcopia on milagros yejhuan mopan nicchihuas. Niman ijquin nochimej quimatisquej aquin nejhua imanyan nochí in tlalticpactli.”

---

<sup>†</sup> **9:10** gemelos    <sup>‡</sup> **9:11-13** después    <sup>§</sup> **9:11-13** le amé    \* **9:16** su misericordia

**18** Tla ijcon, tej, Dios quicnelia on yejhuan quinequi quicnelis niman, quiyoltechicahua on yejhuan quinequi quiyoltechicahua.

**19** Pero yacaj huelis ijquin nechijlis: “Tla ijcon, ¿tlica<sup>†</sup> quitlajtlacoltia Dios on tlacatl? Xacaj huelis quixnamiquis on tlen Dios quinequi quichihuas.

**20** Pero tejhuamej yejhuan san titlacamej, ¿aquin tejhuamej para ihuan Dios timocamatlanisquej? ¿Huelis on contli yejhuan tlachijchiutli ican soquitl quijlis on yejhuan oquichijchiu, “¿Tlica ijquin otinechchijchiu?”

**21** On tlacatl yejhuan quichijchihua on contli yejhua quitocarohua quijtos tlinon quichijchihuas ica on soquitl. Sa no ica on soquitl yejhua quitlapejnenia para quichijchihua se contli yejhuan ipan camanaj xochitl niman ocse para ipan tlasoltemalo.

**22** Para Dios quiteititis itlalhuel niman ipoder, yejhua oquimijyohuilijca on yejhuan quintocarohuaya quiselisquej icastigo.

**23** Ijquin oquichiu para oquiteititij quen sanoyej hueyi on ihueyilis yejhuan otechmacac tejhuamej yejhuan otechicnelij. Ijcon otechmacac tejhuamej yejhuan otechachtojtlalij para ticselisquej on hueyilistli.

**24** Yejhua ica Dios otechnotz. Sequimej tejhuamej tiquistoquej intzajlan on hebreos niman sequimej intzajlan on yejhuan xhebreos.

**25** Ijquin quijtohua ipan on tlajcuilolamatl itoca Oseas:  
On tlacamej yejhuan xnoyaxcahuan<sup>‡</sup> catcaj

---

<sup>†</sup> **9:19** ¿por qué?; ¿tline?    <sup>‡</sup> **9:25** no me pertenecen; toaxcahuan, tohuaxcahuan, totlatquihuan

niquinnoyaxcatis. Niman on yejhuan xniqintlajsojtlaya niquintlajsojtlas.

<sup>26</sup> Niman sa no ompa campa oquimijlijcraj: “Nemejhuamej xnennoyaxcahuan”, ompa quimijlisquej ica yejhamej teconehuan itech Dios yejhuan nochipa nemí.

<sup>27</sup> Pero inca on hebreos ijquin oquijtoj Isaías: “Masqui on yejhuan hualejtoquej itech on tajtli Israel sanoyej miyequej quen itlaj xajli yejhuan oncaj ijtic mar, san quesquimej maquisasquej,

<sup>28</sup> pampa toTeco san isijcapan quincastigaros.”

<sup>29</sup> No ijqui, tej, ye huejcahui oquijtoj Isaías:

Tla toTeco yejhuan quinyecana on isoldados ne ilhuicac xquincahuilisquia on toachtojajhuan quipiasquiaj inhuejcrajconeheuan, titocahuasquiaj quen on chanejquej ne huejhueyican Sodoma niman Gomorrra.

*On hebreos xquiseliaj on cuajli tlajtojli de temaquixtilistli*

<sup>30</sup> ¿Quen ijqui, tej, tiquijtosquej? Tiquijtosquej ica aman Dios quinselia on yejhuan xhebreos itechcopia on intlaneltoc quen on yejhuan yolmelajquej, masqui nion siquiera quitejtemohuayaj quen ijqui Dios quinselis quen on yejhuan yolmelajquej.

<sup>31</sup> On hebreos quitejtemohuayaj itechcopia on tlanahuatiijli quen ijqui Dios quinselis quen on yejhuan yolmelajquej, pero yejhamej xoquitlacamatquej nochí on tlen on tlanahuatiijli tlanahua-

cia.

**32** ¿Tlica xoquinextijquej? Xoquinextijquej pampa xoquitejtemojquej itechcopa on tlaneltoctli, yej oquitejtemojquej itechcopa on tetlacamatilistli yejhuan oquipialijquej on tlanahutijli. Yehua ica onantiquisquej pampa Cristo quen itlaj tetl yejhuan tetlajtlacali.

**33** Ijquin tlajcuilolnesticaj ipan in Yectlajcuilojli: Xquita, ne campa itoca Sión nictalia se tlacatl quen itlaj tetl yejhuan ica nantquisalo niman quen itlaj tepetlatl yejhuan tetlajcali. Pero on yejhuan quineltocas xqueman quipinahuismatis.

## 10

**1** Nocnihuan, ican nochí noyojlo nicnequi ni-man nicchihua oración ica on hebreos ma quipi-acan temaquixtilistli.

**2** Nejhua impan nitlajtohua ica yejhuamej sanoyej\* notlajcalij itech Dios pero yejhuamej xe ixtlajtlapohuij. Yejhuamej xcajsicamatij quen ijqui cuajli nohuicasquej itech Dios.

**3** Yejhuamej xquimatiq quen ijqui Dios quinselia on tlacamej quen on yejhuan yolmelajquej, yej quichihuaj tlen yejhuamej quinemiliaj quimpale-huis para Dios ma quinseli. Yejhua ica xoquiseli-jquej on ojli yejhuan Dios oquitlalij para quiny-olmelahuasquia.

**4** Cristo yejhua oquichiu nochí on tlen itlanahu-til Moisés tlanahuatia niman ijcon oquichiu para nochimej on yejhuan quineltocaj ma quinseli Dios quen on yejhuan yolmelajquej.

---

\* **10:2** mucho

**5** Moisés oquijcuiloj ica on tlacamej yejhuan quinequij Dios ma quinseli quen yolmelajquej pampa quitlacamatij on tlanahuatijli. Ijquin oquijcuiloj: “On yejhuan itechcopa on tlanahuatijli quinequis quipias nemilistli ica oncaj quichihuas nochí on tlen tlanahuatia.”

**6** Pero nijtohua quen ijqui Dios huelis quinselis on tlacamej quen yolmelajquej itechcopa on intlaneltoc yejhuan quipiaj itech Cristo. Ijquin nijtohua: “Ma ca mojticopa xquijto: ¿Aquinon tlejcos ne ilhuicac?” In quijtosnequi ica tlejcos para cuajtemoltis Cristo.

**7** Niman no ma ca xquijto: ¿Aquinon ontimos ijtic in tlajli campa nemij on mimiquej? In quijtosnequi ontimos para quixtis Cristo intzajlan on mimiquej.

**8** ¿Tlinon, tej, más nijtohua? “Itlajtol Dios nisiu motech oncaj. Ticpia ipan mocamac niman ipan moyojo.” Niman in tlajtojli sa no yejhua on tlajtojli yejhuan tiquimijliaj on tlacamej ica ijquin nonequi quineltocasquej.

**9** Ticteijliaj: “Tla ican mocamac tiquijtos ica Jesús yejhua moTeco, niman tla ipan moyojo tincneltocas ica Dios oquiyolihuitij<sup>†</sup> niman oquetzteu ipan itlalcon, timaquisas.”

**10** Ijcon nochihuas pampa ijcuac se tlacatl ican iyojo tlaneltoca, Dios quijtohua ica itlajtlacolhuán yoquitlaxtlau. Niman ijcuac ica icamac teixpan quijtohua ica quineltoca Cristo, yejhua maquisas.

**11** In Yectlajcuilojli ijquin quijtohua: “Nochi on yejhuan quineltoca, xqueman quipinahuismatis

---

<sup>†</sup> **10:9** lo resucitó; oquiyoltij

ipampa itlaneltoc.”

<sup>12</sup> Ixpan Dios, on yejhuan xhebreos xsejsetlama-tiquej<sup>‡</sup> inhuan on hebreos. San se inTeco quipiaj niman yejhua san nochijkej quinmaca miyec tlatiochihualistli intech on yejhuan quitlajtlaniliaj temaquixtilistli.

<sup>13</sup> Ijquin quijtohua on Yectlajcuilojli: “Nochimej yejhuan quitlajtlaniliaj toTeco para ma quintlapo-jpolhui maquisasquej.”

<sup>14</sup> Pero ¿quen ijqui, tej, huelis quitlajtlanilisquej ma quintlapo-jpolhui tla xe quineltocaj? ¿Niman quen ijqui, tej, huelis quineltocasquej tla xque-man caquij itech ica yejhua? ¿Niman quen ijqui, tej, huelis caquisquej itech ica yejhua tla xnemij yejhuan quiteijlisquej?

<sup>15</sup> ¿Niman quen ijqui quiteijlisquej itech ica yejhua tla xnemi yejhuan commintitlanis? In Yectlajcuilojli ijquin quijtohua: “Sanoyej cualtzin ijcuac yejcoj on yejhuan cuajquij on temachtijli de yolsehuilistli niman quiteijliaj on cuajli tlajtojli itech ica temaquixtilistli.”

<sup>16</sup> Pero xnochimej oquiselijquej on tlajtojli yejhuan quitemaca temaquixtilistli. Quen oquijtoj Isaías: “NoTeco, ¿aquinon yoquineltocac on temachtilistli yejhuan ticteijliaj?”

<sup>17</sup> Yejhua ica, tej, se hueli tlaneltoca ijcuac caqui on temachtilistli niman huajlau on temachtilistli ijcuac yacaj techmachtia ica Cristo.

<sup>18</sup> Pero aman nejhua nictlajtlani: ¿Tlen on hebreos xocaquej yejhua in temachtilistli? ¡MelaHuac

---

<sup>‡</sup> **10:12** no hay diferencia; xsejsecnecamej

yejhuamej ocacquej! In Yectlajcuilojli ijquin quijtohua:

On tlajtojli yocaquistic imanyan noch i tlalticpactli. On tlajtojli yoajsic hasta ne campa sa ica noch i xojxomolco in tlalticpactli.

**19** Pero ocsejpa nictlajtlani: ¿tlen manin on hebreos yej xoquinomacaquej cuenta? Moisés yejhua achtoj quinanquila:

Nicchihuas para ma mechnexicolitacan on tlacamej yejhuan chantij ipan ocse país yejhuan nenquijtohuaj ica xnejli país. Niman nicchihuas para xcualanican intechcopia on tlacamej yejhuan xquinequij itlaj cajsicamatisquej.

**20** Quemaj Isaías oquijtoj ican iyolchicahualis on tlen Dios oquimachiltij:

On yejhuan xnechtejtemohuayaj, onechnextijquej; niman oniquinnottitij on yejhuan xnoca tlajtlaniyaj.

**21** Niman ica on país de Israel, Isaías oquijtoj: “Nejhua noch tonajli niquinnotzticaj on tlacamej yejhuan xtetlacamatquej niman teijixnamiquej.”

## 11

### *Oncaj temaquixtilistli para on hebreos*

**1** Aman, tej, nictlajtlani: ¿manin Dios yej yoquitlalcahuij on yejhuan iconehuan? ¡Melauc, tej, ica ca! pampa sa no nejhua nihebreo. Nihualejticaj itech Abraham niman no niquisticaj ipan ichanchanejcau\* toachtojtaj Benjamín.

---

\* **11:1** su familia

<sup>2</sup> Ijcuac xe quitlaliayaj in tlalticpactli, Dios oquimat aquinomej iyaxcahuant<sup>†</sup> yesquej. Dios, tej, xoquintlalcahuij on yejhuan iyaxcahuau. ¿Tlen xnenuimatiij tlinon quijtohua on Yectlajcuilojli campa Elías ican ioración oquinteixpanhuij on hebreos? Ijquin, tej, oquijtoj Elías:

<sup>3</sup> “NoTeco, motiotlajtocabuan yoquinmictijquej, niman motlaixpanhuan<sup>‡</sup> yoquinxoxotonijquej. Aman noselti yoninocau, niman no quinequij nechmictisquej.”

<sup>4</sup> Pero Dios ijquin oquinanquilij: “Yonicnocabuiliij chicome mil tlacatl yejhuan xonotlacuenquetzquej ixpan on yejhuan xnejli dios Baal.”

<sup>5</sup> Aman, tej, sa no ijqui. Hasta aman nocahuaj quesquimej yejhuan Dios ican iteicnelilis<sup>§</sup> oquintlapejpenij.

<sup>6</sup> Niman tla Dios ican iteicnelilis oquintlapejpenij, tla ijcon xoquintlapejpenij pampa itlaj cuajli oquichijquej. Tla Dios quintlapejpenisquia pampa itlaj cuajli quichihuasquiaj, tla ijcon xnejli ican iteicnelilis quintlapejpenisquia.

<sup>7</sup> ¿Niman aman, tej, tlinon? Miyequej on hebreos xoquinextijquej on temaquixtilistli yejhuan sanoyej\* quitejtemohuayaj, pero on yejhuan Dios oquintlapejpenij quemaj oquinextijquej. On ocsequimej oyoltechicajquej

<sup>8</sup> quen in Yectlajcuilojli quijtohua: “Dios oquintlamachilistzacu. Oquinmacac imixtololojhuan

<sup>†</sup> 11:2 le pertenecen; iaxcahuau, ihuaxcahuau, itlatquihuan

<sup>‡</sup> 11:3 tus altares    <sup>§</sup> 11:5 su misericordia    \* 11:7 mucho

yejhuan xtlachaj, niman nacastin yejhuan xtla-caquij, niman hasta aman ijqui nemij.”

<sup>9</sup> David no quijtohua:

Inilhuihuán ma ica nopopolocan niman Dios ma quintlajtlacolmaca niman ma quintlajyohulti ipampa on ilhuimej yejhuan quichihuaj.

<sup>10</sup> Ma ca ma tlachacan, yej ma ixpajpayatican. Niman ma nochipa quintepotzopia on intlamamal.

<sup>11</sup> Aman nejhua nictlajtlani: ¿tlica<sup>†</sup> ijcuac on hebreos ohuetzquej, Dios para yeica xoc quinchihuilia cuenta? ¡Malahuac, tej, ica ca! Pero pampa xotetlacamatquej, aman on yejhuan xhebreos yejhuamej huelij maquisaj. Ijcon nochihua para on yejhuan teconehuan itech Israel no ma quinequican on temaquixtilistli yejhuan quipiaj on yejhuan xhebreos.

<sup>12</sup> Ijcon, tej, on tlalticpactlacamej oquiselijquej hueyi tlatiochihualistli pampa on hebreos xotetlacamatquej, niman on yejhuan xhebreos oquiselijquej temaquixtilistli pampa ixpolijtoquej on hebreos. Tla ijcon onochiu, más sanoyej cuajli yes ijcuac nochimej on hebreos yejhuan Dios quinmaquixtis nochimej tlaneltocasquej.

### *Oncaj temaquixtilistli para on xhebreos*

<sup>13</sup> Aman, tej, nicpia tlen nemechijlis nemejhuatej yejhuan xnenhebreos. Dios onechmacac in tequitl para nemechpalehuis niman para nejhua hueyi quijtosnequi in notequiu.

---

† **11:11** ¿por qué?; ¿tline?

**14** Nicnequi para on yejhuan hebreos quen nejhua ma noxicocan ipampa on temaquixtilistli yejhuan on xhebreos quipiaj. Tla on hebreos noxicosquej, cas huelis sequimej maquisasquej.

**15** Ijcuac Dios oquintlalcahuij on hebreos, yejhua otlahuelseu inhuan on yejhuan xhebreos niman oquinselij. Tla ijcon oquichiu, ¿tlinon, tej, nochihuas ijcuac ocsejpa quinselis on hebreos? San no ijqui quen yolisaj on mimiquej.

**16** Tla yacaj quiyaxcatia<sup>‡</sup> Dios on achtoj tlaxcajli yejhuan quisa itech on tixtli, tla ijcon, tej, nochi on tixtli no iyaxca Dios. Niman ijcuac inelhuayo se cojtli<sup>§</sup> caxcatia Dios, nochi on imahuan no yejhua iyaxca. No ijqui, tej, pampa Abraham achtoj iyaxca Dios, no ijqui on ihuejcacjonehuan iyaxcahuan Dios.

**17** Aman nocnihuan yejhuan xhebreos, yejhua in nemechijlia: on hebreos quipiaj on ojli de temaquixtilistli. Pero Dios oquin cuijli sequimej hebreos niman omechyaxcatilij nemejhuamej yejhuan xnenhebreos. Aman, tej, nenquipiaj sa no yejhua on temaquixtilistli.

**18** Pero ma ca xmohueyimatican niman xnemilican más nencuajcualtin xquen on hebreos. Tla ijqui nenquinemiliaj, san xmatican ica xnemejhuamej nenquimacaj Dios on temaquixtilistli yej yejhua mechmaca.

**19** Yejhua ica on, nemejhuamej huelis ijquin nenquijtosquej: “Quemaj, pero on hebreos oquin cuijli quej inojhui de temaquixtilistli para tejhuatej ma ticpiacan on ojli de

---

<sup>‡</sup> **11:16** le consagra; quiaxcatia, quihuaxcatia, quitlatquitia

<sup>§</sup> **11:16** árbol

temaquixtilistli."

<sup>20</sup> On melahuac, pero yejhuamej oquincuilijquej pampa xotlaneltocaquej, niman nemejhuamej nenquipiaj on ojtli de temaquixtilistli pampa nentlaneltocaj. Yejhua ica, tej, ma ca xmohueyimatican, yej xmotacan sa no nemejhuamej

<sup>21</sup> pampa tla Dios oquincuilij on hebreos inojhui de temaquixtilistli yejhuan achtoj quipiayaj, nemejhuamej yejhuan sa ica ocpa mechyaxcatilia no huelis mechcuilis.

<sup>22</sup> Xquita, tej, quen sanoyej teicneliani\* Dios. Pero no xquita quen tlahuelej. Yejhua tlahuelej intech on yejhuan oquichichihuiliijquej on itemaquixtilis, pero teicneliani nemotech. Niman yejhua mechicnelis tla nennejnemisquej ipan itetlajsojtlalis<sup>†</sup>. Pero tla xnennejnemisquej ipan itetlajsojtlalis, mechcuilis nemoojhui de temaquixtilistli quen oquinchihuiliij on hebreos.

<sup>23</sup> Niman tla on hebreos ocsejpa pehuaj tlaneltocaj, Dios quinmacas on ojtli de temaquixtilistli, pampa yejhua quipia poder para ocsejpa quinmacas.

<sup>24</sup> San xnemilican, tej, ica tla nemejhuamej yejhuan sa ica ocpa mechyaxcatiliaj on temaquixtilistli Dios ohuel mechmacac, más sanoyej, tej, pantlantiticaj ica ocsejpa más huelis quinyaxcatis on yejhuan intech hualejticaj.

*Dios quimpialis teicnelilistli on xhebreos niman on hebreos*

---

\* **11:22** misericordioso    † **11:22** su amor

**25** Nocnihuan, nicnequi para xmatican yejhua in tlen melahuac yejhan iyanticatca para ma ca xmomatican tlamatquej. On tlen melahuac sa no yejhua in: on hebreos yonoyoltechicajcaj para xquiselisquej on cuajli tlajtojli yejhuan quitemaca temaquixtilistli. Pero yejhuamej noyoltechicajtiasquej san chica nochimej tlaneltocasquej on xhebreos yejhuan Dios quinmaquixtis.

**26** Ijcuac ijcon nochihuas, nochimej on hebreos maquisasquej quen quijtohua ipan in Yectlajcuilojli. Quijtohua:

Ne campa itoca Sión hualehuas se temaquixtijquetl, niman quixtis on tlajtlacojli intech on hebreos.

**27** Ijcuac niquintlapojpolhuilis intlajtlacolhuan, nochihuas quen oniquijtoj ipan on pacto yejhuan niquimpialia.

**28** On hebreos onochijquej itlahuelicnihuan Dios pampa xoquiselijquej on cuajli tlajtojli yejhuan quitemaca temaquixtilistli. Yejhua ica Dios yej nemejhuamej omechselij yejhuan xnenhebreos. Pero Dios oquintlapejpenij on hebreos. Yejhua ica oc‡ quintlajsojta§ impampa inachtojtajhuan.

**29** Tlen Dios quinmaca on yejhuan oquintlapejpenij, xqueman quincuilia.

**30** Nemejhuamej yejhuan xnenhebreos achtoj xonenquitlacamatquej Dios, pero aman yejhua mechicnelia pampa on hebreos xoc oquitlacamatquej.

---

‡ **11:28** todavía; sanquen

§ **11:28** los ama

<sup>31</sup> Nochi, tej, sa no ijqui. On hebreos xoc quitlacamatij Dios. Pero on nochihua san para Dios ma quimpiali teicnelilistli\* ijqui quen quimpia nemohuan.

<sup>32</sup> Dios oquicahuilij nochi tlacatl onohuicajquej ipan on xipanteitalistli para huelis quimpialis teicnelilistli intech nochimej.

<sup>33</sup> ¡Sanoyej xhuelis tiquixitasquej on irriquezas Dios, on iflamatquilis<sup>†</sup> niman icajsicamatilis! Xacaj hueli quiteijlia tlica Dios quichihua itlaj, nion xacaj cajsicamati quen ijqui quichihua on itequiu.

<sup>34</sup> On Yectlajcuilojli ijquin quijtohua: “¿Aquinon quimati on tlen toTeco Dios quinemilia? Noso, ¿canon nemi on yejhuan hueli quitlacionnotza toTeco Dios ica on tlen sa no yejhua quichihua?”

<sup>35</sup> ¿Aquinon hueli achtopa itlaj quimaca toTeco Dios, para quemaj quej yejhua no itlaj ica cuajuepilia?

<sup>36</sup> Xacaj hueli, pampa nochi tlajtlamach<sup>‡</sup> itech Dios hualejticaj, niman nochi in tlajtlamach oncaj san yejhua ipampa niman para ihueyilis yejhua. ¡Ma Dios quiseli hueyilistli para nochipa! Ma ijqui nochihua.

## 12

*Pablo quijtohua quen ijqui se hueli notemactilia itech Dios*

<sup>1</sup> Yejhua ica, tej, notlajsojcaicnihuan, pampa Dios sanoyej\* otechtiochiu ican iteicnelilis<sup>†</sup>, nejhua sanoyej nemechtlajtlanilia xmotemactilican

\* **11:31** misericordia      † **11:33** su sabiduría      ‡ **11:36** cosas

\* **12:1** mucho      † **12:1** su misericordia

itech Dios quen itlaj huentli yejhuan yolticaj niman yejyejticaj ijcon quen yejhua cuelita. Tla ijcon nenquichihuasquej, nenquimahuistilisquej Dios quen nonequi.

<sup>2</sup> Ma ca sa xmohuicacan quen on tlalticpactlacamaj nohuicaj, yej xcahuilican Dios ma yejhua quiyencuili nemotlamachilis. Ijquin, tej, nenquimatisquej tlinon Dios quinequi: on tlen cuajli, on tlen quipactia niman nochi on tlen chipahuac.

<sup>3</sup> Dios ican iteicnelilis onechtlalij niapóstol. Yejhua ica nemechijlia nochimej nemejhuamej, ma ca sa no nemejhuamej xnemilican ica más nenhuejhueyixtoquej hasta campa xoc quitocarohua. Yej ican nemotlamachilis xnemilican melajqui quen nonequi nennemisquej. Ijcon, tej, san xquixtthalocan on tlen huelis nenquichihuasquej ica on tlaneltoctli yejhuan Dios omechmacac.

<sup>4</sup> Tocuerpo miyec partes ica tlachijchiutli, niman cada parte quipia oc se tlamantic tequitl.

<sup>5</sup> Aman no ijqui, masqui tejhuamej timiyequej, san se cuerpo tihuajtochihuaj ihuan Cristo. Ijcon, tej, ipan se cuerpo tisesentenemij niman se ihuan ocse titopalehuiyaj.

<sup>6</sup> Cada tisesentemej oticselijquej itech Dios sesetlamantic tetlayocoliltin yejhuan techhueliltia on tlen aman hueli ticchihuaj. Dios otechinmacac ican iteicnelilis quen oquinec. Yejhua ica ma tiquintequiviltican on tetlayocoliltin yejhuan otechmacac. Tla Dios otechmacac on tetlayocolijli yejhuan techhueliltia para ticteijlisquej on tiotlajtojli yejhuan ticseliaj

itech Dios, tla ijcon nonequi ticteijlisquej quen totlaneltoc techyecanas.

<sup>7</sup> Tla Dios otechmacac on tetlayocolijli yejhuan techhueliltia para tiquimpalehuisquej ocsequimej, nonequi, tej, ma titepalehuican. Niman tla Dios techhueliltia para titemachtisquej, no nonequi para ma titemachtican.

<sup>8</sup> Tla ijcon, tej, tla totetlayocolil techhueliltia titeyolehuaj, nonequi yejhua ticchihuasquej. Niman tla techhueliltia para itlaj tictetlayocoliaj, nonequi ticchihuasquej hasta campa tihuejisquej. Noso tla techhueliltia titeyecanaj, ma tiquitacan cuajli quen titeyecanasquej. Niman tla yej techhueliltia tiquimpalehuiyaj on yejhuan itlaj quimpolojticaj, tla ijcon nonequi ticchihuasquej ican pactli.

*On yejhuan quineltocaj Cristo nonequi cuajli no-huicasquej*

<sup>9</sup> Se ihuan ocse xmopialican on tetlajsojtlalistli‡ yejhuan chipahuac. Xtlahuelitacan on tlen xcuajli niman xchihuacan on tlen cuajli.

<sup>10</sup> Xmotlajsojtlacan se ihuan ocse quen icniutin, niman sanoyej xmotlacaitacan sequimej ihuan ocsequimej.

<sup>11</sup> Xchihuacan canica niman ma ca xtlatzihuican. Niman ican nochí nemoyojo xtequipanocan toTeco.

<sup>12</sup> Xpacanemican ipampa nemotlamachalis§. Ijcuac nentlajyohuisquej, xpiacan ikyohuilistli. Ma ca queman xcajcahuacan ica nenquichihuaj oración.

---

‡ **12:9** amor   § **12:12** esperanza

<sup>13</sup> Xquimpalehuican on yejhuan teyaxcahuan\* itech Dios tla itlaj quimpolohua, niman cuajli xquinselican on yejhuan mechtlaipalohuaj.

<sup>14</sup> Xtlajtlanilican Dios ma quintiochihua on yejhuan mechtlahuelitaj niman mechtlayohuiltaj. Ma ca xtlajtlanilican ma quintlajyohuilti, yej ma quintiochihua.

<sup>15</sup> Xpaquican inhuan on yejhuan paquij, niman xchocacan inhuan on yejhuan chocaj.

<sup>16</sup> Ma ca xpiacan tlahuejli inhuan ocsequimej. Ma ca xmohuejhueyimatican, yej xmohuicacan inhuan on yejhuan mayanquej. Ma ca xmomati-can nentlamatquej.

<sup>17</sup> Tla yacaj mechchihuilia itlaj xcuajli, ma ca no ijqui xcuepilican. Xchihuacan canica para nen-quichihuasquej noch i tlen cuajli imixpan nochi tlacatl.

<sup>18</sup> Xchihuacan canica hasta campa nenhuelisquej quen ijqui nemoyolica nennemisquej ihuan nochi tlacatl.

<sup>19</sup> Notlajsojcaicnihuan, ma ca sa no nemehuamej itlaj xtecuepiltican, yej xcahuilican Dios ma yejhua tetlayohuilti, pampa in Yectlajcuilojli ijquin quijtohua: “Nejhua nictecuepiltis; nitet-laxtlahuilis quen nonequi.” Ijquin quijtohua toTeco.

<sup>20</sup> Niman in Yectlajcuilojli no ijquin quijtohua: “Tla motlahuelicniu apismiqui, xtlacualti, niman tla amiqui, xcatliti. Ijcuac ijcon ticchihuas yejhua quipinahuismatis on tlen omitzchihuili.”

\* <sup>12:13</sup> le pertenecen; teaxcahuan, tehuaxcahuan, tetlatquiuhuan

**21** Ma ca xmocahuilican ma mechtlani on tlen xcuajli. Yej ica on tlen cuajli xtlanican on tlen xcuajli.

## 13

**1** Nochi tlacatl ma tetlacamati intech on tequihuajquej, pampa xnemij tequihuajquej yejhuan Dios xoquincajactij, yej noch i quech tequihuajquej nemij Dios oquincajactij.

**2** Yejhua ica, tej, on yejhuan quixnamiqui on tequihuajquetl, quixnamiqui on tlen Dios oquitlalij. Niman on yejhuan ijcon quichihuaj quiselisquej tlajtlacolmacalistli ipampa on tlen quichihuaj.

**3** On yejhuan quichihuaj tlen cuajli xnomojtiaj intech on tequihuajquej, yej san on yejhuan quichihuaj on tlen xcuajli. ¿Ticnequi, tej, tinemis xican nemojtijli intech on tequihuajquej? Tla ijcon ticnequi tinemis, cuajli xmohuica, niman on tequihuajquej mitztlacaitasquej.

**4** Dios oquincajactij tequihuajquej para mitzpalehuisquej. Pero tla xcuajli timohuica, xquinmacajsi pampa on tequihuajquej melahuac tecastigarohuaj. Yejhuatej itequitcahuan Dios yejhuan castigaroisquej quen nonequi on yejhuan quichihuaj on tlen xcuajli.

**5** Yejhua ica nonequi para xquintlacamati on tequihuajquej, xsan para ma ca ticselis on castigo, yej pampa ticmatzticaj ica nonequi para ijqui tichiwas.

**6** Yejhua ica, tej, no nenquitlaxtluaj on impuestos, pampa on tequihuajquej quichihuaj interui pampa quitequichihiliaj Dios.

**7** Nochimej xquintlaxtlahuilican on tlen nenquinhuiquiliaj. Xquintlaxtlahuilican on yejhuan nenquinhuiquiliaj inrentas, niman on yejhuan nenquinhuiquiliaj impuestos. Xtlacaitacan on yejhuan quimelahua\* quiselis tetlacaitalistli, niman xselican quen hueyixticaj on yejhuan hueyixticaj.

**8** Ma ca yacaj itlaj xcuiquilican, yej san yejhua on tetlajsojtlalistli<sup>†</sup> yejhuan se ihuan ocse nonequi quinopialisquej. Ijcuac se tlacatl tetlajsojtlia, on tlen tlanahuatia itlanahuatil Moisés nochi yoquitlacamat.

**9** On tlanahuatiltin yejhuan ijquin quijtohuaj: “Ma ca tiahuilnemis, ma ca titemictis, ma ca titlachtequis, ma ca tiquelehuis on tlen teyaxca”, niman nochimej on ocsequimej tlanahuatiltin tenquisaj nochi tla nenquitlacamatij in tlanahuatijli yejhuan ijquin quitohua: “Xtlajsojtlia motlapticpacchanejcau no ijqui quen tejhua timotlajsojtlia.”

**10** Yejhuan tetlajsojtlia xquitechihuilia on tlen xcuajli. Yejhua in quijtosnequi ica tla se tlacatl tetlajsojtlia, yejhua quichihua nochi tlen tlanahuatia on tlanahuatijli.

**11** Nonequi para ijcon nenquichihuasquej, pampa ye nenquimatztoquej tlen tonajli tinemij. Yejhua ica, tej, xtlamachilistlachacan niman xmatican tlinon nochijticaj aman, pampa más ye nisiu huajlau Cristo para techquixtis ipan in tlalticpactli xquen ijcuac achtoj onentlaneltocaquej.

**12** Ye tlamic in tonaltin ijcuac tinemij ipan in tlalticpactli, niman ye nisiu pehuas on tonaltin

---

\* **13:7** merece    † **13:8** amor

ijcuac tinemisquej ihuan Dios. Yejhua ica xcajcahuacan on tlen xcuajli yejhuan tlacamej quichihuaj ipan in tlalticpactli. Xtlanican on xcuajli niman xchihuacan on tlen cuajli.

<sup>13</sup> Ma titohuicakan cuajli quen on yejhuan nemij ihuan Dios ipan chipahualistli. Ma ca ma titlahuantinemican, niman ma ca ma tiakan ne ilhuipan campa sa tzajtzihuaj. Ma ca ma tiahuinemican niman ma ca ticahuilican ma quinequi totlalnacayo on tlen xcuajli. No ma ca ma titohuijsoquican inhuan ocsequimej. Niman no ma ca ma titenexicolitacan.

<sup>14</sup> Yej ocse tlamantic. Xmohuicakan quen to Teco Jesucristo nohuica, niman ma ca ma xnemilican quen nenquipactisquej nemotlalnacayo ica on tlen yejhua quinequi.

## 14

### *Xcuajli para tiquimistlacosquej on tocnihuan*

<sup>1</sup> Xselican on tlacatl yejhuan xmás cuajli cajsicamatí on temachtijli yejhuan ticneltocaj. Pero ma ca nemotlajtolhuisoquisquej ica on tlen yejhua xcajsicamatí.

<sup>2</sup> In se ejemplo. Se tlacatl quinemilia huelis quicuas nochí quech sesetlamantic tlacuajli oncaj, pero ocse tlacatl xcajsicamatí niman quinemilia san huelis quicuas quijli.

<sup>3</sup> Aman, tej, on yejhuan nochí tlajtlamach tlacuajli quicua, ma ca ma quinemili ica xitlaj\* quimati on yejhuan xijqui tlacua. No ijqui on yejhuan san ican quijli napanoltia, ma ca ma

---

\* **14:3** nada; coxtla

quistlaco on yejhuan quicua nochí quech tlajtlamach tlacuajli oncaj, pampa Dios no yoquiselij on tlacatl.

<sup>4</sup> ¿Aquin tejhua in para tiquistlacos itequichihuiliijcau ocse tlacatl? Tej, san on aquin iteco huelis quijtos tla cuajli noso xcualji on tlen quichihua. Niman yejhua melajcanemis pampa toTeco quipia poder para quipalehuis ma melajcanemi.

<sup>5</sup> Nictlalis ocse ejemplo. Nemotzajlan se tlacatl quinemilia ica se tonajli más hueyixticaj xquen ocse. Pero nemi ocse tlacatl yejhuan quijtohua ica nochí tonaltin sa no ijqui. Cada se, tej, ma nomelajcatlali ipan itlamachilis.

<sup>6</sup> On tlacatl yejhuan quejehua se tonajli, quejehua para quitlacaitas toTeco. Niman on yejhuan xquejehua, no xquejehua para quitlacaitas toTeco. Yejhuan quicua nochí tlajcuajli, quichihua para quitlacaita toTeco pampa quimaca tlaxtlahuijli Dios. Niman yejhuan quinemilia ica Dios xcahuilia para quicuas nochí tlajcuajli, xquicua para quitlacaita toTeco, niman yejhua no quimaca tlaxtlahuijlij Dios.

<sup>7</sup> Nion se de tejhuamej nemi san para sa no yejhua, nion miqui san para sa no yejhua.

<sup>8</sup> Yej tla tinemij, tinemij para toTeco, niman tla timiquij, timiquij para toTeco. Tla tinemij noso tla timiquij, titeyaxcahuan<sup>†</sup> itech toTeco.

<sup>9</sup> Yejhua ica, tej, Cristo omic niman ocsejpa oyoliu para yejhua onochiu inTeco intech on

---

<sup>†</sup> **14:8** le pertenecemos; titeyaxcahuan, titehuaxcahuan, titetlatquihuan

yejhuan yoltoquej niman on yejhuan micatzitz-intin.

<sup>10</sup> Pero ¿tlica<sup>‡</sup> yacaj quistlacohua icniu? Niman ocse, ¿tlica yacaj quinemilia quen xitlaj quimaj-mati icniu? Tinochimej, tej, tiasquej ixpan Cristo para yejhua techyolcuitis niman techtlaxtlahuilis quen nonequi.

<sup>11</sup> In Yectlajcuilojli ijquin quiptoqua:  
“Ijcon quen melahuac niyolticaj, quiptoqua  
toTeco, no melahuac ica nochí tlacatl  
nixpan notlacuenquetzas niman nochimej  
teixpan quiitosquej ica melahuac nejhua  
niDios.”

<sup>12</sup> Ijqui tej, cada se ica oncaj tiquijlisquej Dios  
nochí tlen cuajli niman on tlen xcuajli ticchihuaj.

*Xcuajli para ticchihuaultis mocniu ma huetzi  
ipan tlajtlacojli*

<sup>13</sup> Yejhua ica, tej, xoc quitocarohua titistlacoj-tiasquej ihuan ocsequimej. Yej xchihuacan ocse tlamantic. Xchihuacan canica para ma ca it-laj nenquichihuasquej yejhuan ica najantiquisa nemocniu ipan itlaneltoc, noso contlajcalis ipan tlajtlacojli.

<sup>14</sup> Pampa nicneltoca Cristo Jesús, nejhua cuajli nicyolmatzticaj ica nochí tlen oncaj chipahuac. Pero tla yacaj quinemilia ica itlaj xchipahuac, on xchipahuac para yejhua.

<sup>15</sup> Tla ticpajsolohua mocniu ican on tlen ticua, xoc timohuica ican tetlajsojtlalistli§. Ma ca xchihuua para yacaj ma polihui yejhuan Cristo ipampa omic, san ipampa on tlen ticua.

‡ **14:10** ¿por qué?; ¿tline?    § **14:15** amor

**16** Masqui ticmati ica on tlen ticchihua cuajli, ma ca sa xchihua tla quijtohuaj ica on tlen ticchihua tlajtlacojli,

**17** pampa ne campa Dios tlamandarohua on tlen ticus noso ticonis xitlaj\* quijtosnequi. Pero on yolmelajcalistli niman yolsehuilistli, niman on pactli yejhuan ticpiaj itechcopa on Espíritu Santo, yejhua hueyi quijtosnequi.

**18** Yejhuan ijquin quitequichihuilua Cristo, quipactia Dios niman quitlacaitaj on tlacamej.

**19** Yejhua ica, tej, ma tiquejecocan ticchihuasquej on tlajtlamach<sup>†</sup> yejhuan cuajquij yolsehuilistli, niman quimiscaltiaj ocsequimej impan intlaneltoc.

**20** Ma ca xpopolo itequiu Dios san yejhua ica on tlen tiquicua. On melahuac ica nochí tlacuajli chipahuac para nocuas, pero yej xcuaajli para ticus on tlen quinchihaultia ocsequimej comintlajcali ipan tlajtlacojli.

**21** Cuajli ticchihuas tla xticuas nacatl, nion ticonis vino, nion ticchihuas itlaj yejhuan ica najantiquisas mocniu, noso yejhuan contlajcali ipan tlajtlacojli, noso yejhuan quiyemanilis itlaneltoc.

**22** Ma ca inhuan ocsequimej xmocamatlanij ica on tlen tejhua ticnemilia, yej san tejhua xconmati ihuan Dios. On tlacatl paqui yejhuan xometlamati itech on tlen quichihua.

**23** Pero Dios quitlajtlacolmacas on yejhuan itlaj quicua ican ometlamatilistli, pampa xquineltoca ica Dios quinequi para ma quicua. Nochi tlen se quichihua ican ometlamatilistli, yejhua tlajtlaco-

\* **14:17** nada; coxtla    † **14:19** cosas

jli.

## 15

*Nonequi tiquimpactisquej ocsequimej niman ma ca sa no tejhuamej ma titopactican*

<sup>1</sup> Tejhuamej yejhuan ticojtiquej ipan totlaneltoc nonequi tiquimpalehuisquej ipan impasolol on yejhuan xcojtiquej impan intlaneltoc. Ma ca, tej, sa no tejhuamej ma titopactican.

<sup>2</sup> Cada se de tejhuamej ma tiquimpactican ocsequimej ica on tlen cuajli para yejhuan. Ijcon nonequi ticchihuasquej para yejhuan noscaltisquej ipan intlaneltoc.

<sup>3</sup> Ijcon ma ticchihuacan pampa nion Cristo sa no yejhua onopactij. In Yectlajcuilojli quijtohua on tlen Cristo oquijlij Dios: “Nopan ohuetz intlahuel on yejhuan mitztlahuelitayaj.”

<sup>4</sup> Nochi tlen ye huejcahui onijcuiloj ipan on Yectlajcuilojli, onijcuiloj para techmachtia. Onijcuiloj para ma ticpiacan totlamachalis\* itechcopa on ijyohuclistli niman teyoltlalilistli yejhuan techmaca on Yectlajcuilojli.

<sup>5</sup> Ma Dios, yejhuan quitemaca ijyohuclistli niman teyoltlalilistli, mechpalehui para san se nemoyojlo nenquipiasquej inhuan ocsequimej, ijcon quen iejemplo Jesucristo mechititia,

<sup>6</sup> para ica san se inyojlo niman ica san se tlajtojli ma quiyectenehuacan Dios, iTajtzin toTeco Jesucristo.

*On cuajli tlajtojli yejhuan quitemaca temaquixtilistli yoasic interch on yejhuan xhebreos*

---

\* **15:4** nuestra esperanza

**7** Aman, tej, xmoselican ihuan ocsequimej quen Cristo otechselij, para Dios quiselis ihueyilis.

**8** Nejhua nemechijlia ica Cristo onochiu tequichijquetl intech on hebreos. Ijcon, tej, caxitia on promesas yejhuan Dios oquintlalilij on toachtojtajhuan, niman ijquin oquiteititij ica Dios nochipa quichihua tlen quijtohua.

**9** Cristo no ohuajlaj intech on xhebreos quen tequichijquetl para yejhuamej ma quihueyilican Dios ipampa iteicnelilis<sup>†</sup>, ijcon quen Cristo oquijlij Dios ipan in Yectlajcuilojli:

Yejhua ica intzajlan on xhebreos nimitzyectene-huas, niman nitlacuicas ican motocatzin on tlacuicaltin.

**10** Niman ocsecan ipan on Yectlajcuilojli no quijto-hua:

Nemejhuamej yejhuan xnenhebreos xpaquican inhuan on yejhuan hebreos.

**11** Niman ocsejpa quijtohua in Yectlajcuilojli:  
Nochimej nemejhuamej yejhuan xnenhebreos xyectenehuacan Dios. Niman nemejhuamej tlacamej nemochimej<sup>‡</sup> xhueyitenehuacan.

**12** Niman Isaías no quijtohua ipan itlajcuilol:  
Se huejca teixhuiu§ itech Isaí huajlas. Yejhua quinmandaros on yejhuan xhebreos. Niman yejhuamej itech quitlalisquej intlamachalis.

**13** Ma Dios, yejhuan quitemaca tlamachalistli\*, ma mechmaca nochí pactli niman yolsehuilistli

† **15:9** su misericordia      ‡ **15:11** todos ustedes; nannochti, yemochimej, anochimej, innochimej, emmochimej      § **15:12** descendiente      \* **15:13** esperanza

pampa nenquineltocaj para nenquipiasquej miyec tlamachalistli itechcopa ipoder on Espíritu Santo.

<sup>14</sup> Nocnihuan, cuajli nicmatzticaj ica nemejhuamej nententoquej ican cuajlilistli niman ican noch i tlamatquilistli<sup>†</sup>, niman huelis nemotlacanonotzasquej.

<sup>15</sup> Pero ipan in tlajcuilolamatl yonemechijcuilo-huilij xican nemojtjili para ocsejpa nemechel-namictia ica on tlajtlamach<sup>‡</sup>. Ijquin yonemechijcuilohuilij pampa Dios ican iteicnelilis onechtlalij para niapóstol,

<sup>16</sup> para nictequichihuilis Jesucristo intzajlan on yejhuan xhebreos. Yejhuamej niquimijlia on cuajli tlajtojli yejhuan quitemaca temaquixtilistli yejhuan itech Dios quisticaj. Niman niquimijlia quen yacaj tiopixqui quimijlisia. Niquimijlia on temachtijli para nochihuasquej quen se huentli yejhuan Dios huelis quiselis, niman yejhuan on Espíritu Santo yoquichipau.

<sup>17</sup> Aman, tej, ica ninemi san secan ihuan Cristo Jesús, nipaqui ica on tequitl yejhuan nicchihua para Dios.

<sup>18</sup> Xnitlajtlajtos itlaj ica ocse tequitl. San nitlajtlajtos ica on tlen Cristo oquichiu notechcopa intzajlan on xhebreos. Aman, tej, yejhuamej quitlacamatij Dios ipampa on tlen oniquinmachtij niman on tlen onicchii

<sup>19</sup> itechcopa ipoder on tlamajhuisoltin niman on milagros, niman itechcopa ipoder on Espíritu Santo. Ijcon, tej, nohuiyan desde Jerusalén hasta ne iregión Ilírico cuajli yonictemitij ica on cuajli

† 15:14 sabiduría    ‡ 15:15 cosas

tlajtojli yejhuan quitemaca temaquixtilistli itech-copa Cristo.

<sup>20</sup> Nochipa onicnec nicteijlis on cuajli tlajtojli ne campa xe quixmatij ica Cristo. Ijquin onicnec nicchihuasquej pampa xonicnec nitemachtis ne campa ocse tlacatl otequit.

<sup>21</sup> Yej nicchihua quen in Yectlajcuilojli quijto-hua:

Yejhuamej quitasquej on yejhuan xqueman in-tech omachiyato. Niman cajsicamatisquej on tlen xqueman ocacquej ica yejhua.

### *Pablo quinemilia yas ne Roma*

<sup>22</sup> Masqui miyecpa onicnec nias nemechontas xohuel oniaj pampa ica oncatca nicteijlis on cuajli tlajtojli yejhuan quitemaca temaquixtilistli intza-jlan on yejhuan xe queman caquiyaj.

<sup>23</sup> Pero aman ica yonitequitlan ipan in inye-hualican, niman ica miyec xipan yonicnectinen nemechontas,

<sup>24</sup> nicpia tlamachalistli§ ica aman quemaj huelis nemechontas ijcuac nias ne España. Niman quemaj ijcuac yonicpix pactli ica yonemechitac ipan quesqui tonaltin, nicnequi nennechpalehuisquej ica on tlen nechpolos para najsis ne España.

<sup>25</sup> Pero aman niau Jerusalén niman niquitqui se ofrenda para iteyaxcahuan\* Dios yejhuan ompa nemij,

<sup>26</sup> pampa on tocnihuan yejhuan chanejquej ne ipan on inregión Macedonia niman Acaya ican pactli oquinemilijquej para oquisentlalijquej

---

§ 15:24 esperanza   \* 15:25 le pertenecen; iteaxcahuan, itehuax-cahuan, itetlatquihuan

se ofrenda, niman quintitlaniliaj on tocnihuán mayanquej yejhuan nemij ne Jerusalén.

<sup>27</sup> Yejhamej oquinemilijquej ica cuajli para ij-con quichihuasquej. Niman melahuac nonequi quincepilisquej on hebreos pampa on tlanel-tocaquej hebreos oquixelosquej on cuajli tlaj-tojli yejhuan quitemaca temaquixtilistli inhuan on xhebreos. Yejhua ica on yejhuan xhebreos nonequi quixelosquej on tlen tlajtlamach quipiaj inhuan on hebreos.

<sup>28</sup> Quemaj ijcuac nejhua yonitlan notequivu niman yoniquinmacac in ofrenda, niquisas para nias España, niman nemechnotzas ijcuac nipanos.

<sup>29</sup> Cuajli nicmatzticaj ica ijcuac nemotech najsis, Cristo sanoyej<sup>†</sup> techtiochihuas.

<sup>30</sup> Nocnihuán, sanoyej nemechtlahtlanilia ipampa toTeco Jesucristo niman ipampa on tetlajsojtlalistli<sup>‡</sup> yejhuan on Espíritu Santo mechmaca, san secan nohuan xchihucan oración ican nochí nemoyojlo itech Dios nopampa.

<sup>31</sup> Xtlajtlanilican Dios ma nechmanahui intech on tlacamej xtlaneltocaquej yejhuan nemij ne Judea. Niman no xtlajtlanilican para on tocni-huan nemij ne JerusaLén ma quiselican ican pactli on tlen niqumitquila

<sup>32</sup> para tla Dios quinequi, ma naksi nemotech ican hueyi pactli niman ijqui tiyolpachihuisquej.

<sup>33</sup> Ma Dios yejhuan quitemaca yolsehuilistli ma nemi nemohuan. Ma ijqui nochihua.

## 16

---

<sup>†</sup> **15:29** mucho    <sup>‡</sup> **15:30** amor

*Pablo tlanahuatia ma quintlajpalohuilican sesentemej on yejhuan itechcopia Cristo icnihuan*

<sup>1</sup> Nicnequi xmatican ica in tocniu itoca Febe, cuajli sihuatl. Yejhua quimpalehuiya ica itequiu Dios on yejhuan tlaneltocaj ne ipan on pueblo itoca Cencrea.

<sup>2</sup> Xselican cuajli ican itocatzin toTeco ijcon quen nonequi on yejhuan teyaxcahuan\* itech Dios. Niman xpalehuican ica on tlen quipolohua, pampa yejhua miyequej yoquimpalehuij niman hasta nejhua no yonechpalehuij.

<sup>3</sup> Xquintlajpalocan on tocniuhan Priscila niman Aquila yejhuan onechpalehuijquej ipan itequiu Cristo Jesús.

<sup>4</sup> Yejhuatej san para oquimanahuijquej nonemilis, ica yonocajcaj nemiyaj para miquisquiaj nopampa. Niman aman xsan nejhua niquinmaca tlaxtlahuijli, yej no quinmacaj tlaxtlahuijli nochimej on tlaneltocaquej yejhuan xhebreos.

<sup>5</sup> No xquintlajpalocan on tocniuhan yejhuan nosentlaliaj ichan Priscila niman Aquila. No xtlajpalocan on notetlajsojcau<sup>†</sup> Epeneto yejhuan ne Acaya achtopa yejhua oquineltocac Cristo.

<sup>6</sup> No xtlajpalocan María yejhuan sanoyej‡ yotequit nemotech.

<sup>7</sup> On nohebreoicnihuan Andrónico niman Junias no xquintlajpalocan. Yejhuatej nohuan tzacuticatcaj niman on apóstoles quipiaj tetlacaitalistli intech yejhuatej. Yejhuatej achtoj oquineltoquej Cristo xquen nejhua.

\* **16:2** le pertenecen; teyaxcahuan, tehuaxcahuan, tetlatquihuan

† **16:5** mi amigo    ‡ **16:6** mucho

<sup>8</sup> Xtlajpalocan Amplias, notetlajsojcau itech-copa toTeco.

<sup>9</sup> Xtlajpalocan Urbano yejhuan otequit tohuan ipan on tequitl yejhuan ticchihuaj ipampa Cristo Jesús, niman on notetlajsojcau Estaquis.

<sup>10</sup> Xtlajpalocan Apeles yejhuan Dios oquitlat-latac niman yoquitac ica melahuac quineltoca Cristo. Niman no xtlajpalocan ichanchanejc-ahuan§ Aristóbulo.

<sup>11</sup> Xtlajpalocan on nohebreoicniu Herodión, niman on icniutin ipan ichanecau Narciso yejhuan quineltocaj Cristo.

<sup>12</sup> Xtlajpalocan Trifena niman Trifosa yejhuan tequitij ipan itequiu toTeco, niman on totlajsoj-caicniu Pérsida yejhuan sanoyej tequiti ipan itequiu toTeco.

<sup>13</sup> Xtlajpalocan Rufo yejhuan sanoyej cuajli tlaneltocaquetl, niman inan yejhuan nechpia quen iconeu.

<sup>14</sup> Xquintlajpalocan Asíncrito, Flegonte, Hermas, Patrobas, Hermes niman on tocnihuan yejhuan ompa inhuan nemij.

<sup>15</sup> No xquintlajpalocan Filólogo niman Julia. Ni-man no xquintlajpalocan Nereo niman on icniu sihuatl. Xtlajpalocan Olimpas niman nochimej on iyaxcahuan Dios yejhuan ompa inhuan nemij.

<sup>16</sup> Cualtzin xmotlajpalocan inhuan ocsequimej ican tetlajsojtlistli\*. Nochimej on tlaneltocaquej itech Cristo mechtlajpalohuaj.

<sup>17</sup> Nocnihuan, sanoyej nemechtlajtlanilia para xmotacan sa no nemejhuamej intech on yejhuan

§ <sup>16:10</sup> su familia

\* <sup>16:16</sup> amor: Ipan griego quitohua: “beso santo”.

texexelohuaj niman tetlamachilispolohuaj ican intlaneltoc niman quixnamiquij on temachtilti yejhuan yonenquiselijquej. On quenomej xquintlalcahuican

<sup>18</sup> pampa yejhuamej xquitequichihuiliaj toTeco Jesucristo, yej san quichihuaj quen inxcuajli elehuilis<sup>†</sup> quinequi. Yejhuamej quintlamachilispopolohuaj ican incualtzin tlajtol niman inyemancatlajtol on tlacamej yejhuan xtlamatquej.

<sup>19</sup> Nochi tlacatl quimati quen nenquintlacamatij on temachtilti yejhuan yonenquiselijquej, niman yejhua ica on sanoyej nipaqui. Pero nicnequi sanoyej xyolchicajquej para nenquichihuasquej on tlen cuajli, niman ma ca para nenquichihuasquej on tlen xcuajli.

<sup>20</sup> Niman Dios yejhuan quitemaca yolsehuilistli saniman quitlajcalis nemocxitlan on Satanás. Ma toTeco Jesucristo mechtiochhua hueyi.

<sup>21</sup> Timoteo yejhuan tequiti nohuan ipan in tequitl mechtlajpalohua. Niman Lucio, Jasón, niman Sosípater yejhuan nohebreoicnihuan no mechtlajpalohuaj.

<sup>22</sup> Nejhua Tercio, yejhuan niquijcuilojticaj in tlajcuilolamatil yejhuan Pablo nechijlijiu, no nemechtlajpalohua ican itocatzin toTeco.

<sup>23</sup> Mechtlajpalohua tocniu Gayo yejhuan ichan ninocajtinemi, niman no ompa ichan nosentlaliaj in yejhuan tlaneltocaj. Erasto on yejhuan tesorero ipan on hueyican niman tocniu Cuarto no mechtlajpalohuaj.

---

<sup>†</sup> **16:18** deseos

**24** Ma toTeco Jesucristo nemochimej<sup>‡</sup> ma mechtiochihua hueyi. Ma ijqui nochihua.

*Pablo quiyectenehua Dios*

**25** Niman aman ma ticyectenehuacan Dios yejhuan huelis mechmelajcatlalis ipan nemotlaneltoc. Yejhua mechmelajcatlalis itechcopa on cuajli tlajtojli yejhuan quitemaca temaquixtilistli yejhuan nicteijlia niman itechcopa on temachtijli ica Jesucristo. Yejhua in temachtijli cuajli quisa ijcon quen Dios yoquipanextij on iyanalistli§ yejhuan achtoj iyanticatca desde ijcuac xe oncatca in tlalticpactli.

**26** Pero nochí yejhua on aman nopalnextia niman yomachiyac itechcopa on Yectlajcuilojli yejhuan oquijcuilojquej on tiotlajtojquej ijcon quen Dios yejhuan nochipa nemi otlanahuatij ma nochihua. Ijquin otlanahuatij Dios para nochihuiyan niman nochimej on tlacamej ma quinelcocan niman ma quitlacamatican.

**27** ¡Ma Dios yejhuan san iselti nochí tlamatqui, para nochipa ma quiseli hueyilistli itechcopa Jesucristo! Ma ijqui nochihua.

---

<sup>‡</sup> **16:24** todos ustedes; nannochti, yemochimej, anochimej, innochimej, emmochimej    § **16:25** secreto

**In yencuic iyectlajtoltzin Dios itech ica  
toTeco Jesucristo  
New Testament in Nahuatl, Guerrero  
(MX:ngu:Nahuatl, Guerrero)**

copyright © 1987 Wycliffe Bible Translators, Inc.

Language: Nahuatl, Guerrero

Translation by: Wycliffe Bible Translators, Inc.

Náhuatl, Guerrero [ngu], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Nahuatl, Guerrero

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
f85e296d-89bd-5d7f-b7c2-328bd8e643b1